

JŌN

Kaviyak o Colai Ayɛet Jŏn

Zɔɔz o Rogeto

1 ¹ Baale da laadun kinatamma e zɔɔz tɔ, ma zɔɔz nici arome kibeen Jook. Mazin da zɔɔz nici Jook neen. ² Arome baale laadun kinatamma e niini kibeen Jook. ³ Ma ɛɛnycai kaal dook ɲaatin, ma akɔm gi codoi tɔr nɔkɔ calaɲ ɛɛnycai ɲaatin. ⁴ Ma waanice zɔɔz nici roget neen, ma rogeti nici anyaak ɔl vooritin. ⁵ Ma vooritin nici iya otokol muur, ma ɲaan muuri kidiit nɔɔnɔ been neen. ⁶ Anyak baale eet ci itoona Jooi ci kazi zaar ne Jŏn. ⁷ Aku niini ka kiiya kizi bacoi ci vooritino ka kutuweec ɔl dook vooritin nico. ⁸ Mazin niini alya alaɲ een vooritin neen, olla niini bacoi ci vooritino. ⁹ Mazin nici vooritin ween didi baal akunak looc ka kiiya kotokol ɔl dook e neen.

¹⁰ Aavi waanice zɔɔz nici tɔ loota laadun, ma ɛɛnycai lɔɔci ɲaatin, ma bar ɲaan lɔɔci kaga nɔɔnɔ. ¹¹ Akunak niini ɔl ogin maany, ma ɲaan ɔl ogine alya kagamta nɔɔnɔ. ¹² Maje ɔl o agama nɔɔnɔ, ma atu zaar ogin anyek niini nɔɔgo dook dɔyiz kiziti dɔl ci Joowo. ¹³ Alaɲ eegin niigi dɔl ci Joowo gole o aritan ɛeti ci deer, bar eegin niigi dɔl cigin tiryante o Joowo.

¹⁴ Ma zɔɔz nici otowe izi eet ci deer, ma iya abaak niini ɲaatinai. Anyak niini deten ki bonat ci appe. Kicinta naaga alya diɲdiɲon onin baal anyonek nɔɔnɔ giye o ɛɛne niini ɲɛerti Joowo o adoi tɔr nɔkɔ.

¹⁵ Uuwak waanice Jŏn ween bacoi onin azi ne, “Eet baal kaduwakuɲ kanekuɲ ne, Anowanan tiɲeere ɛeti ci adiɲdiɲ ɲaatan e neen nici. Eeci aavi niini tɔ baale laadun ɲaatan naana kitiryai e.”

¹⁶ Mazin detene onin adikir kojokta naaga dook mayuwenet ci appe. ¹⁷ Anyaa baale Jooi lotinok ɲaatan Mosis, maje deteni kibeen zɔɔz ween didi ajoyai ɲaatan Yesu Kiristo. ¹⁸ Akɔm laadun eet ci icinun Jook. Bar ɲɛerin o adoi tɔr nɔkɔ o atobɔ ki nɔɔnɔ neen o anyewun nɔɔnɔ kagawe.

Zɔɔz o Jŏn o Oonyi

¹⁹ Ceeni zin bacokzet o Jŏn iitene baal itoonake ɔl o Juz Jerusalema nɔɔnɔ alaat o ceez o Joowo been ɔl o kazi Livai ka kɔɔt kijinit niigi nɔɔnɔ kenektek ne, “Ma dim ineet ɲeneɛn?”

²⁰ Mazin Jŏn ɲaan kadaɲɔ, bar waanice aduwak niini nɔɔgo zɔɔz ci abil tɔp anek ne, “Alaɲ keen naana Kiristo o ka kiiya neen.”

²¹ Ma ajin bodo niigi nɔɔnɔ anek ne, “Ineet zin ɲeneɛn? Ineet Ilija?”

Ma abedeke Jŏn nɔɔgo anek ne, “Akɔm.”

Ma bodo ajin niigi nɔɔnɔ anek ne, “Een bɔɲ nyakanan gi?”

Ma abedeke Jŏn nɔɔnɔ anek ne, “Akɔm.”

²² Ma vurta enektek niigi nɔɔnɔ ne, “Ineet zin ɲeneɛn? Duwayet ka kɔɔt kuduktaya naaga ɔl ci ona itoonanet o zɔɔz ci akanin ineet.”

²³ Ma abedeke Jŏn nɔɔgo anek ne, “Keen naana molok ci kuuwai balala ebaal aduwan nyakanani o kazi Izaya ane ne, Anyak tiɲeere molok ci uuwak balala azi ne, Amadek Manyi gɔl onin kibil tɔp e.”

²⁴ Ma ajin bodo ɔl o Parici nɔɔnɔ anek ne, ²⁵ “Zin mā alaɲ een niina Kiristo, ma alaɲ een Ilija, ma buk alaɲ een nyakanan, oony zin ɔl naa?”

²⁶ Ma abedeke Jŏn nɔɔgo anek ne, “Koony naana ɔl maami doon, bar zin anyak eet oma ɲaatunooɲ ci ɲaan niiga agaac. ²⁷ Aku anowanan tiɲeere niini aneet vurta, ma alaɲ kaganona naana ɲaati kaborcane nɔɔnɔ caava ogin zɔɔne.”

²⁸ Ma kaala nicigi dook agooni ɲaao kazi Bezani liil o kazi Jordan libire ci jenu e ɲaabaal oonyi Jŏn ɔl e.

Aduwa Jŏn zɔɔz ci akati Yesu

²⁹ Ma iitene co icinun Jŏn Yesu akunak nɔɔnɔ, ma azi ne, “Icinit di nyɔɔn o Joowo aku ka kiiya kaara baciinok o loocu nici.

³⁰ Eet zin baal kaduwakuɲ kanekuɲ ne, Anowanan tiɲeere ɛeti ci adiɲdiɲ ɲaatan e neen nici, eeci aavi niini tɔ baale laadun ɲaatan naana kitiryai e. ³¹ Mazi naana alya ɲaan nɔɔnɔ kaga, olla zin naana kakun, ma koonye maami o ka kagaac ɔl o Israyil nɔɔnɔ.”

³² Ma buk aduwa Jŏn zɔɔz ci azi ne, “Kacin iiten baale Vɔɲiz o Joowo akunak looc tamma kiyo yeelac o, ma aku aavi ɲaatin.

³³ Ma naana alya ɲaan nɔɔnɔ kaga, bar zin Jooi o itoonanan aneet ka kiiya kotoony ɔl maami anekan ne, Acin tiɲeere Vɔɲiz o Joowo akunak looc tamma, ma aku aavi eete oman. Mazin ɛeti nici eet o ka kotoony ɔl Vɔɲize o Joowo neen.” ³⁴ Ma azi Jŏn ne, “Kicina naana alya kaal nicoko. Inoko zin kanekuɲ ne, ɛeti nici ɲɛerti Joowo neen.”

Awa Yesu Nuyak Iiyu

³⁵ Ma iitene co bodo arome Jŏn kibeen nuyak ogin een ram. ³⁶ Mazi acin niini Yesu ɲaati awɔyi, izi ne, “Nyɔɔn o Joowo nica.”

³⁷ Mazi azii nuyawa ceen ram noko zɔɔz nico, oneec niigi Yesu. ³⁸ Mazi abuudi Yesu, acin nɔɔgo anowa nɔɔnɔ, ma ajin niini nɔɔgo anek ne, “Arooɲnyu naa?”

Ma abedeke niigi nɔɔnɔ anek ne, “Rabai, aave ɲaa?” (Ma keɲ ci zaar nico kazi ne alaan o demziinto.)

³⁹ Ma abedeke Yesu nɔɔgo anek ne, “Ivita ka icinit ɲinti kaave o.”

Maje ziiti izi ziik wec yomana. Ma ɔrkor niigi kibeen nɔɔnɔ zɛɛ been ɲin o aave niini. Ma arome niigi kibeen nɔɔnɔ iiten nice dook.

⁴⁰ Ma nuyawe ceen ram azii zɔɔz ci aduwa Jŏn, ma ano Yesu noko codoi ɲaatineej Andoru ween gotɔni Saiman Pitɔr.

⁴¹ Kataman nɔkɔ ojowa Andoru gotɔni o kazi Saiman, ma anek nɔɔnɔ ne, “Kujuktawa Masaya.” (Ma keɲ ci kazi Masaya o kazi ne Kiristo ween ruguzoi.)

⁴² Ooyi ni niini Saiman ɲaati Yesu. Ma agelem Yesu Saiman, ma anek ne, “Saiman ɲɛerti Jŏn, inoko akatozeyin ineet zaara ci kazi Sivas.” (Ma zaara ci kazi Sivas o kibeen zaar ci kazi Pitɔr o akati keɲ cine be.)

Awa Yesu Pilip kibeen Natanyel

⁴³⁻⁴⁴ Ma iitene co ook Yesu looce o kazi Galili. Ma gola urumto kibeen eet ci kazi Pilip. Maje Pilip laadun eet ci kutur o kazi Bezediya. Buk Andoru kibeen Pitɔr abaak kuture nice. Ma anek Yesu nɔɔnɔ ne, “Nowawan.”

⁴⁵ Ma ako Pilip ɲaati Natanyel, ma anek niini nɔɔnɔ ne, “Kojoktawa eet baal ayɛet Mosis waragewe o lotinowu, ma ayɛet buk nyakaɲaneta e. Niini Yesu ween ɲɛerti Josev o kutur o kazi Nazaret.”

⁴⁶ Ma ajin Natanyel Pilip anek ne, “Ma dim anyak gi ci abon didi ka kiiya Nazarakti?”

⁴⁷ Mazi ako acin Yesu Natanyel akunak nɔɔnɔ nɔkɔ, izi ne, “Eet zin ween Israyilen didi akom ɲaatin volɔɲ neen nici.”

⁴⁸ Ma ajin Natanyel Yesu anek ne, “Agayan ku?”

Ma abedeke Yesu nɔɔnɔ anek ne, “Kicinin uyene ɲaa ona aave loota raa moneeca ɲaɲan Pilip kotowawin e.”

⁴⁹ Ma abedeke Natanyel nɔɔnɔ anek ne, “Alaan o demziinto, een niina ɲɛerti Joowo. Ma een alaan o Israyil.”

⁵⁰ Ma anek Yesu nɔɔnɔ ne, “Utuwo, eeci kanekin ne, kacinin uyen ɲaa ona aave raa moneeca e? ɲaɲan zin bar ɲiɲeere acin kaal ci adiɲɲiɲ kujuk nicoko.”

⁵¹ Ma anek Yesu nɔɔɔ dook ne, “Didile kaduwakuɲ igeet, acinu ɲiɲeere niiga tammu taden akoli, ma acinu toonnyak o tammu avo tammu tadena, ma avunak looc ɲaaten ɲɛerti Eeto.”

Iiɲkayi ol kuture o kazi Kana

2¹ Ma iinyaye ceen iiyu anyak ɲiɲkawiin kuture o kazi Kana abil looce o kazi Galili. Maje yaati Yesu aavi buk ɲinaante. ² Ma awo buk ol Yesu kibeen nuyak ogin ɲaati ɲiɲkawiinto noko. ³ Mazi ako adicai nyaani, enek Yesu yaatine ne, “Okoma ol nyaan.”

⁴ Ma abedeke Yesu nɔɔnɔ anek ne, “Alaɲ een zɔɔz cun. ɲaɲan rak aneet iiteni onane kiiya ka keyelek ol diɲɲiɲon onan.”

⁵ Ma anek yaati Yesu ol ceen gabara o ne, “Olla gi ci aduwakuɲ niini igeet odomta utuguz.”

⁶ Maje ɲinaante anyak ijunya ceen tɔrkɔnɔm ci ɛɛnycai biyene ci gɔɔn arek ol o Juz maam ci ka kutuguzi niigi keer uneen toonyento. Akoyi gɔɔn iju codoi burwet eetoma karabɔɲ een eetoma kamɔɔ.

⁷ Ma anek Yesu gabara ne, “Ibitizit ijunya nicoko maami.” Ibitizit ni niigi ijunya maami tɔc.

⁸ Enek ni Yesu bodo nɔɔɔ ne, “Otogoca zin inoko ci miliny anycek eet ween abuu o ɲiɲkawiinto.” Otogocak ni zin didi niigi nɔɔnɔ. ⁹ Mazi ako atar ɛeti ceen abuu ci ɲiɲkawiinto noko maam ci utuye kizi nyaan noko, alaɲ aga ɲinti akuni nyaani nici o. Maje gabara ona agɔca maam e aga niigi nɔkɔ. Otowa ni ɛeti ceen abuu ci ɲiɲkawiinto o eet ci arɔce o. ¹⁰ Ma aku anek ne, “Gɔɔn ol dook anyaa rak kernok nyaan ci abon o zɔwa zee mazi ook abaakte ol, anyaaktak ni niigi nɔɔɔ nyaan o acanɲai. Maje bar niina itaɲ rak nyaan ci abon o kibil zee anyaa ni vurma.”

¹¹ Nicini zin gi o atɛet ol biye agɔɔn Yesu zɔwa kuture o kazi Kana looce o kazi Galili neen, ma ayeizai waanice titinyoni onine. Makacin utuweec nuyawa ogine nɔɔnɔ.

¹² Mazi ako adicai ɲiɲkawiin nici, zɔzɔz Yesu ki yaatin kibeen gɔtɔnɔgi been nuyak ogin zɔɔ kuture o kazi Kapernam, ma avo amon ɲinaante iinya ci miliny.

Ako Yesu Ceeze o Joowo

¹³ Mazi ka kiiya iiteni o ol o Juz gɔɔn aadane niigi iiten baal vardanɲinto e, itija Yesu ook Jerusalema. ¹⁴ Mazi ako arum niini kaluwa o ceez o Joowo, amada bar ol ci ataaline tiin kibeen ɛɛza ki yeela ɲinaante. Maje buk ol o abali guruc aavtiz loota ɲinaante tarabezete. ¹⁵ Mazi acin niini nɔɔɔ agɔɔn kaal nicoko, ook utuguwa nyabok ceen loro, ma aku aruwa ol ki tiin ki ɛɛza, ma atɔɔwak nɔɔɔ dook bitaalin. Ma uup tarabezete kazaante guruca ci ol o abali guruc e dook lai. ¹⁶ Ma agerenyek niini ol o ataaline yeela anek ne, “Uduntɔ yeela nicoko bitaala. Má anyeku ceez ci baaba o kizi ɲinti taalinto.”

¹⁷ Aada ni nuyawa ogine zɔɔz o ayeedi waragewe o Joowo azi ne, “Ma reezinet o ceez unun avaadan aneet ziniz kiyo goo o.”

¹⁸ Abadaak ni alaata o ol o Juz nɔɔnɔ, ma avu ajin anek ne, “Gitaz ci ateedet biye agooneket ka kagayin naaga ineet anyei alaazet ci agɔɔne gi ci abil nɔkɔ o.”

¹⁹ Ma abedeke Yesu nɔɔɔ anek ne, “Oyoyit ceez ci Joowo noko. ɲaɲan bodo keenyeti iinyaye ceen iiyu.”

²⁰ Ma anek niigi nɔɔnɔ ne, “Eenyeti iinyaye ceen iiyu ku? Ceez baal adica irkitok eet ram ki tiin tɔrkɔnɔm eenycinta e.”

²¹ Zin waanice ceez ci Joowo aduwa Yesu o bar akati ɛle onin maany. ²² Mazi ako ɲaaz Yesu daayiza e, aada nuyawa ogine uduwa baale niini gi nico. Utuweec ni niigi warage o Joowo akati nɔɔnɔ kibeen zɔɔz o aduwa Yesu.

Aga Yesu ol dook

²³ Ma ɲaabaal aave Yesu Jerusalema iitene o vardanɲinto e, utuweec nɔɔnɔ ol ci meelik ger kaale o atɛet ol biye baal icinit niigi agɔɔn niini e.

²⁴ Maje bar Yesu alaɲ arek nɔɔɔ ziniz juruɲ, eeci aga niini ol dook nɔkɔ. ²⁵ Ma alaɲ arɔɔɲ niini eet ci aku aduwak nɔɔnɔ zɔɔz ci akati eet oma, eeci niini alya aga kaal o ɛel zinzeetine ugeec nɔkɔ.

Yesu Kibeen Nikodimos

3¹ Anyak baale eet ceen Pariciwen ci kazi zaar ne Nikodimos. Niini alaan ci Juz. ² Ma baaline oman iya ook ɲaati Yesu, ma ako anek nɔɔnɔ ne, “Alaan o demziinto, kagayin naaga ineet nɔkɔ een niina alaan ci demziinto itoonnyai Joowa. Eeci akom eet ci agɔɔn kaal ci atɛet ol biye kiyo ci agoon niina noko, dooke coma aavi Jooi ɲaatin.”

³ Ma abedeke Yesu nɔɔnɔ anek ne, “Didile kaduwakin ineet, akom eet ci acin baliin o Joowo, dooke coma aritai bodo niini kizi colak.”

⁴ Ma ajin Nikodimos nɔɔnɔ anek ne, “Ka kitiryai ɛeti ci idikir kizi colak bodo ku? Ka kimiurozek yaatin keɲ, ma bodo aritai?”

⁵ Ma abedeke Yesu nɔɔnɔ anek ne, “Didile kaduwakin ineet, mā alaɲ aritai ɛeti maami kibeen Vɔɲize o Joowo, alaɲ baliin o Joowo ajowa been neen. ⁶ Mā ɛeti ci aritai alye ci eet o deer, anyak niini ɛle ci eet o deer. Maje ɛeti ci aritai Vɔɲize o Joowo anyak niini Vɔɲiz o Joowo. ⁷ Má anyi zin bar kibiirin zɔ giye ci kanekin ne, Abon aritanu niiga dook iziti colaye bodo o. ⁸ Gɔɔn ɲɔɔti akɔla, ma iim olla libir ci te arɔɔɲ niini. ɲɛdet zin kazii molok ci olla ivaani o. Bar alaɲ kaga aku libire jaɲ, ma aku ako ki inin. Abil zin buk ɛeti ci aritai Vɔɲize o Joowo o nɔkɔ.”

⁹ Ma ajin Nikodimos Yesu anek ne, “Ka dim kibil gi nici noko o ku?”

¹⁰ Ma abedeke Yesu noko anek ne, “Een niina alaan ci demziinto ole o Israyil. Alañ zin gi nico aga ku? ¹¹ Didile kaduwakin ineet, naaga kaduwana kaal o kagaya, ma koobja kaal o kicinta. Maje bar niiga alañ aroonyu agamta zozz onayañ. ¹² Mayo ma kaduwakuñ kaal ci loocu, ma alañ agamanu o, ma tedec ma kuduwakunñ kaal ci tammu tadenu ka agamta ku?”

¹³ Akom zin laadun eet ci ook tamma, bar ñeerti Eeto o aavi tamma neen o iiya tamma. ¹⁴ Zin kiyo baale adonj Mosis kowat ween ziit keeta balala e, adonjyi buk tiñeere ñeerti Eeto noko. ¹⁵ Ka eeti ci atu noko calañ adaai, bar ka kojowa niini roget o abil been neen. ¹⁶ Ma giye o areezi Jooi looc ɔɔɔt, anyek ñeerin o adoi ɔɔɔt noko, ka eeti ci atu noko calañ adaai, bar ka niini kojowa roget o abil been neen. ¹⁷ Ma Jooi alañ itoonak ñeerin looc ka kiiya kapayek looc gerzitin, bar ka korogoz looc. ¹⁸ Ma zin eeti ci atu ñeerti Joowo alañ bodo noko apawonek gerzitin, maje eet calañ atu noko apawozek noko gerzitin odota, eeci alañ niini atu ñeerti Joowo o adoi ɔɔɔt noko. ¹⁹ Apayek zin Jooi looc gerzitin o, eeci iyyak vooritin looc, maje bar ol areez muur kujuk vooritin, eeci agoon niigi kaal ci ger. ²⁰ Ma ol o goon agoon kaal o ger abor niigi vooritin, ma alañ avunak vooritin been neen, eeci alañ aroonj niigi kaal ugeec ger agoon keyelizyai. ²¹ Maje eeti ci agoon kaal o aroonj Jooi dook akunak niini vooritin ka kayelizyai kaala o abon agoon niini, eeci agoon niini kaal o aroonj Jooi.”

Yesu kibeem Jon o oonyi

²² Ma vurta itingaza Yesu kibeem nuyak ogin, ɔɔɔt looce o kazi Judiya. Ma avo amon ñinaante, ma oony ol. ²³ Maje buk waanice Jon oony ol ñaao kazi Anon o ajonjɔ ki ñin o kazi Salim, eeci meele maama ñinaante. Ma avunak ol noko tup noko ñinaante, ma oony niini noko. ²⁴ Ma kaala nici agooni ijaan Jon kacabe e.

²⁵ Ma iitene oman adanjo nuyawa o Jon ogene kibeem eet ceen Juz giye ci akati keeranɛ ugeec goon oonyi eleeti ka kobontai Joowa. ²⁶ Makacin ivitak niigi Jon, ma avu anek ne, “Alaan o demziinto, eet baal arumonu liile o Jordan baagita baal azi ne, Niini Kiristo e, inoko oony ol, ma avunak ol dook noko. Yo zin gi nici abon?”

²⁷ Ma abedeke Jon noko anek ne, “Akom laadun eet ci anyak dɔyiz mā alañ anyek Jooi noko. ²⁸ Ma zin niiga alya iziiktu zozz baal kuduwakunñ kanekunñ ne, Alañ keen naana Kiristo, bar olla kitoonnyai noko cowa e. ²⁹ Iziiktu di! Goon laadun nyatarani akati eet o aviica noko. Maje lañoti eet o aviica nyataran atalne niini ñaati aziññi eet o aroce molok. Inoko zin naana katalo ɔɔɔt ele. ³⁰ Abon zin adiñdij Yesu ɔɔɔt, maje naana keen celbez.”

³¹ Ma eeti o aku tamma adikir niini kujuk ol dook. Ma eeti o loocu niini eet ci loocu, ma azozz niini kaal o loocu doon. Maje bar eeti o aku tamma adikir niini ole dook. ³² Eeci aduwa niini kaal o icinun kibeem kaal o iziiwun tamma, ma bar akom eet ci agama zozz cin o. ³³ Maje zin eeti ci agama zozz cin o niini bacoi ci ayelza gi o Jooi alañ eene volonjyoi. ³⁴ Ma eeti o itoona Jooi noko anyaa niini zozz o Joowo, eeci abitiz Jooi noko Vɔñize onin. ³⁵ Areez Jooi ñeerin, ma anyek kaal dook noko kanyak niini aziite onin. ³⁶ Ma eeti ci atu ñeerin ajowa roget o abil been neen. Maje bar eeti calañ ñeerin agama, alañ roget acin, bar bornet nonj o Joowo aavi ñaatin.”

Azozz Yesu been ñaa ceen Samariyen

4 ¹ Iziiyit ni ol o Parici awañ ci azi ne, Oony Yesu nuyak ci meel kujuk Jon. ² Mazin bar giye ween didi Yesu alye onin akom eet ci oony, bar oony ol nuyawa ogine. ³ Mazi ako azii Yesu zozz nico, otanj Judiya, ma abadaak Galili. ⁴ Ma gola iiya idiir niini looc o kazi Samariya.

⁵ Ma ñinaante ook niini kuture o kazi Sikar o ajonjɔ ki mana baal anyek Jakob ñeerin o kazi Josev e. ⁶ Maje tuuwi o Jakob aavi ñinaante. Aavu ni Yesu loota ñinaante uyubuz tuuk otoga, eeci apirna niini ki weet. Maje ii ibilun boloca. ⁷ Maje nuyawa ogine arakte ɔɔɔt kuture nico ka koo kataalta dayiin.

⁸ Iiya ni ñaa ceen Samariyen aroonj kiiya kɔɔgɔc maam. Ma anek Yesu noko ne, “Nyan da maam ci kawudi.”

⁹ Ma abedeke ñaa nici Yesu anek ne, “Ma niina alañ een eet ci Juz? Ma naana alañ keen ñaa ci Samariya? Ajinan zin maam ku?” (Azi ñaa nici noko o, eeci goon laadun ol o Juz alañ azolon diicit ci maamu kibeem ol ci Samariya.)

¹⁰ Ma abedeke Yesu noko anek ne, “Mā aga niina gi o goon anyek Jooi ol, ma agayanñ buk niina aneet ci kajinin maam o keen ñeeneen, abon waan ajinan ka kanyin ineet maam ci rogeto.”

¹¹ Ma abedeke ñaa noko anek ne, “Mazin yo ma alañ anyei abala ci ka tɔgɔcai maam, ma wun tuuwi o, ka zin jai maam ci rogeto o ñaadanj? ¹² Anyet baale ageeta tuuk nico jijitinaañ Jakob. Awot baale tuuk nico niini alya ki dɔl ogin ki tiin ogin. Ma zin yo niina adiñdij juk Jakob?”

¹³ Ma abedeke Yesu noko anek ne, “Ma eeti ci awot maam nicoko aruk noko kɔɔr bodo. ¹⁴ Maje eeti ci awot maam o kanyi naana noko, alañ aruk kɔɔr bodo been neen. Eeci maama ci kanyi naana noko o eel alye cin o kizi zawanec ci anyek noko roget ci abil been neen.”

¹⁵ Enek ni ñaa nici noko ne, “Alaan, nyan da maam nicoko ka calañ bodo arukan kɔɔr ka buk calañ bodo kabada kiiya kɔɔgɔc maam ñina.”

¹⁶ Ma anek Yesu noko ne, “Bitɔ towa eet unun ivita ñina.”

¹⁷ Ma abedeke ñaa noko anek ne, “Akomnan eet.”

Ma anek Yesu noko ne, “Didi zin aleema zozz ci azi ne, Akomnin eet o. ¹⁸ Eeci arii baale lak tur, ma zin eeti ci aavtiyu ki ineet inoko o alañ een eet cun. Aduwa zin didi niina zozz ci aleem.”

¹⁹ Ma anek ñaa Yesu ne, “Alaan, kacinin ineet een inoko nyakanan. ²⁰ Baale jijitigaacak adiñdijan Jook biye nico, maje bar niiga Juza aniyu ne, Abon een Jerusalem ñinti ka kidiñdijanti Jook neen.”

²¹ Ma anek Yesu noko ne, “Ziiyan di aneet! Aku tiñeere iiteni calañ bodo adiñdijani ol baaba biye nico karabonj een Jerusalema doon. ²² Adiñdijanu niiga ol ci Samariya o gi calañ agayu, maje naaga kadiñdijana gi ci kagaya, eeci rogzen aku ñaaten Juz.

²³ Aku zin tiñeere iiteni, bar zin buk iiteni nica iiya laadun, ka zin ol o adiñdijan Jook didi kidiñdijanit noko ween baaba vɔñize onin kibeem zooze ween didi. Eeci aroonj Jooi ol kidiñdijanit noko gole nico. ²⁴ Jooi niini vɔñiz, ma ol o adiñdijan noko abon adiñdijan noko vɔñiza kibeem zooze ween didi.”

²⁵ Ma anek ñaa noko ne, “Kaga ñedet tiñeere aku Masaya ween Kiristo. Zin tiñeere mā iiya niini, ñaan aku aduwaket kaal dook.”

²⁶ Ma abedeke Yesu noko anek ne, “Aneeta Kiristo ele neen ci kazozz ki ineet noko.”

²⁷ Mazi n̄aan azoozo Yesu ki n̄aa noko, abada nuyawa ogine. Mazi acin niigi Yesu azoozo ki n̄aa nico, ibiirrit n̄oozo ooti giye nico oroot ele. Bar akom n̄aatineej ci anek n̄aa ne, “Aroon n̄aatin naa?” Karabon ajin Yesu anek ne, “Azoozonu ki n̄aa nico naa?”

²⁸ Otonjek ni n̄aa iju onin maamu e looc, ma amiironek korok, ma ako anek ol dook kuture uneej n̄inaante ne, ²⁹ “Ivita di icinit eet ci aduwakan kaal ogan baal kagoon e dook ce. Bar bon niini Kiristo neen?” ³⁰ Udunta ni niigi korogjowe ivita ot icinit Yesu.

³¹ Maje nuyawa anek Yesu ne, “Alaan o demziinto, ija, dawo.”

³² Bar abedeke niini n̄oozo anek ne, “Kanyei naana dayiin cigan calan niiga agayu.”

³³ Ma ajin n̄uyawa niigi maany ane ne, “Anyak te eet ci anyawun n̄oono dayiin?”

³⁴ Ma abedeke Yesu n̄oozo anek ne, “Dayiin cigan neen ci kagooe gi o aronj eeti o itoonanan aneet ka kidica liqlinon onin.

³⁵ Goon niiga anonu ne, Adica labina nyelowe wec kani keteedjai. Bar zin naana kanekun ne, Icinit di maneen. Inoko ibiirito labina ka keteedjai. ³⁶ Mazin goon eet ci ateedi aruwonek n̄oono v̄oyita ci liqlinon onin ka kanyaak niini ol roget o abil been neen. Ma atalne eeti o eevyi kibeene eet o ateedi buk. ³⁷ Aleem zin olit o azi ne, Goon eeti codoi adowe, maje eeti oman ateedi. ³⁸ Kitoonun zin naana igeet ka ot eteedit maneen calan adowanu niiga. Ipirta baale ol ogen liqlinonte nico. Ot zin niiga ka ot eteedit maneen ci baal eeva niigi o.”

³⁹ Utuweec ni ol ci meelik ole o Samariya kuture nice Yesu, eeci anek n̄aa n̄oozo ne, “Aduwakan eeti n̄ici kaal ogan baal kagoon e dook.” ⁴⁰ Mazi avu arum ol ci Samariya noko Yesu, ilaltek niigi n̄oono komon rak n̄aatineej. Mon ni Yesu n̄inaante iinya ram.

⁴¹ Mazi ademez Yesu n̄oozo, utuweec ol ci meelik n̄oono demziinte onin. ⁴² Ma anek niigi n̄aa ne, “Ala n̄ katuwena naaga giye o kaziikna n̄aatun doon, bar katuwena o, eeci kiziikta naaga alya n̄oono, ma kagawuta buk naaga alya didi niini Kiristo ween ruguzoi o loocu neen.”

Arogoz Yesu logo ci eet ceen alaan

⁴³ Mazi adica Yesu iinya ram n̄inaante, itija ook Galiliya. ⁴⁴ Eeci azi niini ne, “Akom laadun nyakanan ci adiindjan ol looce onin ele.” ⁴⁵ Mazi ako arum Galili, atalta ol n̄oono n̄inaante, eeci icinit niigi kaal baal agoon niini e dook iitene baal aloten ol Jerusalema aadane iiten baal vardainto e, eeci buk waanice niigi aavtiz lotente nice to. ⁴⁶ Bodo enice imiizezek Yesu kutur o kazi Kana looce o kazi Galili n̄aabaal ookci niini maam kizi n̄yaan e. Maje n̄inaante anyak alaan ci amoor n̄eerin n̄aao kazi Kapernam. ⁴⁷ Mazi ako azii alaani n̄ici Yesu, itijawa Judiya, iyyak Galili. Iyyak niini n̄oono, ma ilalek n̄oono kook Kapernama ka kook korogoz n̄eerin o aronj kadaak n̄inaante.

⁴⁸ Ma anek Yesu n̄oono ne, “Niiga ma n̄aan ikivtek kaal ci ateedun biye, ala n̄ atuwenu.”

⁴⁹ Ma ilalek alaani n̄ici n̄oono anek ne, “Alaan, ija kiyiyit taman ijaan kadaak n̄eeran.”

⁵⁰ Ma anek Yesu n̄oono ne, “Bito labak! Ala n̄ n̄eerun adaai.” Utu ni alaani zoz ci aduwak Yesu noko o, ma awo. ⁵¹ Ma gola iya urumto kibeene gabara ci aliqlin n̄aatin, ma anek niigi n̄oono ne, “Urugun n̄eerun.”

⁵² Ma ajin niini n̄oozo ka kuduktak n̄oono ziit ci da mayini dole o. Ma abedeke niigi n̄oono anek ne, “Abada n̄oono ele bariton balawaz ziite o adoi waaz.” ⁵³ Ma aada baati dolece n̄ici ziit baal aneke Yesu n̄oono ne, “Bito, labak, ala n̄ n̄eerun adaai e neen.” Utuy ni niini kibeene ol o korok onin dook.

⁵⁴ Mazin enico izi lak ram ci agooni Yesu kaal ci atet ol biye eo abadaan niini Judiya akunake Galili e.

Arogoz Yesu eet ci amoor

5 ¹ Ma iitene oman anyak ol o Juz micit cineej aloten Jerusalema. Ook ni buk Yesu n̄inaante. ² Maje Jerusalema n̄inaante anyak lamurden ci ajonoz araan o azawu. Kazi lamurden nico zooze o ol o Juz ne Bazaaz. Anyak lamurdeni n̄ici cezi ceen riinya tur. ³ Maje riinyaye nicoko oogin ol ci meelik ger ole o rubenik ki ole ci n̄oolik been ole ci rebrebik. ⁴ Eeci waanice goon toonnyaiti ci Joowo iinyaye ogen aku, ma iinak lamurden nico, ma amooni maam. Mazi adakonj eeti, ma iinak maam ol zowa ijaan amoot maama, aroge niini moorizowe ogin dook. ⁵ Ma ole nicoko anyak eet ci amoor irkitok eetoma kamoto ki tiin turge. ⁶ Mazi ako acin Yesu n̄oono onj loota noko, agawun niini n̄oono anyak mooriz n̄inti wun oroot. Ma ajin Yesu n̄oono anek ne, “Aroon rogo moorize cun noko?”

⁷ Ma abedeke eeti ci amoor noko n̄oono anek ne, “Alaan, akom eet ci ka kooyan lamurdena n̄aati goon te amooni maama. Goon manjan kawo gola, arawun bar te eeti oman lamurden.”

⁸ Ma anek Yesu n̄oono ne, “Tiya je. Doma kuwen cun o, to.” ⁹ Kataman noko urugun eeti n̄ici, ma adoma kuwen onin, ma awo.

Maje waanice iiteni nica iiten o yubzento. ¹⁰ Ma anek ol o Juz eet ci ona aroge o ne, “N̄icini iiten o yubzento. Ala zin agano lotinowe ogaac n̄aati ilole kuwen cun o noko.”

¹¹ Ma abedeke eeti n̄ici n̄oozo anek ne, “Anekan eeti ci uyen aruguzan o ne, Doma kuwen cun o, to.”

¹² Ma ajin niigi n̄oono anek ne, “Eet jan ci anekin ne, Doma kuwen cun o, to, o?”

¹³ Maje eeti n̄ici alya n̄aan kaga n̄eneen ci arogoz n̄oono o, eeci Yesu ot n̄aao aavtiye kole e.

¹⁴ Ma n̄intimiliny ook ojowa Yesu n̄oono kaluwawe o cez o Joowo, ma anek niini n̄oono ne, “Inoko urugu mooriza. Teedo zin baciinok ka calan bodo akunakin gi ci gerze oroot kujuk nice.”

¹⁵ Ook ni eeti n̄ici uduwak alaata o Juz gi ci anek ne, “Bar te ci arogozan o Yesu gi.” ¹⁶ Gi zin baal laadun amarnin alaata o Juz Yesu, ma aronj kurukti niigi n̄oono kadaak e neen, eeci aliqlin niini iitene o yubzento.

¹⁷ Ma anek Yesu n̄oozo ne, “Ma baaba goon laadun aliqlin niini iinya dook noko. Abon zin buk naana aliqlin kiyo niini o.”

¹⁸ Bar enico otobortek alaata o Juz Yesu onj oroot, ma aronj gol ci ka kurukti niigi n̄oono kadaak. Ala een giye ci baal aliqlin iitene ceen Sabit o doon, bar eeci azi Yesu ne, Jooi baatin gi, ma atobzek buk niini ele Jook.

Alaazet o n̄eerti Joowo

¹⁹ Ma abedeke Yesu n̄oozo anek ne, “Didile kaduwakun igeet, akom n̄eerti Joowo gi ci agoon oowe cin doon, bar agoon niini kaal o acin agoon baatine. Mazin kaal o agoon baatine neen o agoon buk n̄eerin. ²⁰ Eeci Jooi areez n̄eerin, ma ayelek n̄oono kaal o goon agoon niini dook. Bar zin bodo buk tiyeere ayelek niini n̄oono kutugu kaal ci adiindjan oroot kujuk nicoko, ka kibiirtun igeet dook ooti. ²¹ Kiyo goon ijaani Jooi ol daayiza, ma anyek bodo n̄oozo korogit o, buk tiyeere n̄eerin agoon noko. Anyek roget eet ci olla te aronj niini kanyek. ²² Akom baatine eet ci ka kapak, bar anyewun n̄eerin d̄oyiz ci ka kapayi ol dook niini. ²³ Ka zin ol dook kidindjanit n̄eerin kiyo adiindjan niigi baatin o. Ma eeti calan adiindjan n̄eerin, ala buk adiindjan niini baatin o itoona n̄oono.

²⁴ Didile kaduwakuŋ igeet, ma ɛeti ci azii zɔɔz o kaduwa, ma atu Jook o itoonanan aneet, anyak niini roget o abil been neen. Ma alaŋ tiŋeere nɔɔnɔ apawonek gerzitin, bar atayanun niini daayiz laadun ook rogeta. ²⁵ Didile kaduwakuŋ igeet, aku iima iiteni, bar zin buk iiteni nica iya laadun. Ma iitene nice azii ɔl o adaayito molok o ŋeerti Joowo, ma ɔl o azii nɔɔnɔ dook arogi. ²⁶ Zin kiyo Jooi alye onin een gɔl ci rogeto o anyek buk niini ŋeerin kizi gɔl ci rogeto. ²⁷ Anyewun zin niini nɔɔnɔ alaazet ci ka kapai ɔl giye o ɛene niini ŋeerti Eeto. ²⁸ Anyak tiŋeere iiten ci aku ci aziikni ɔl o adaayito dook looknyai molok onin. Má anyeku zin kibiirtuŋ ooti giye nico. ²⁹ Mazin iitene nice aduŋna ɔl o da gɔɔn agɔɔn kaal o abon looknyai, ma arogi roget o abil been neen. Maje ɔl o da gɔɔn agɔɔn kaal o ger apawonek nɔɔgo gerzitin. ³⁰ Akom zin gi ci kagoon naana oowe can doon, bar kapai naana kaal eo aduwakan Jooi aneet. Ma payiin cane o abil tɔp, eeci alaŋ kataman kutugu gi ci karooŋ naana, bar kagoon eo arɔɔŋi baaba o itoonanan aneet.

³¹ Mate waan kizi bacoi ci kazɔɔze ele cano maany, alaŋ waan kaleem, ma kaala ci kaduwa o alaŋ waan agano ŋaati agamnyan. ³² Bar zin anyak eet oma ceen bacoi can. Ma kaga naana zɔɔz o aduwa niini ŋaaten aneet zɔɔz ceen didi. ³³ Itoonteyu baale niiga ɔl Jɔn, ma aduwa waanice niini zɔɔz ween didi. ³⁴ Alaŋ zin karooŋ naana bacokzet ci eet ci deer, bar olla kaduwakuŋ zɔɔz nico o ka coma arognu. ³⁵ Baale Jɔn abil niini kiyo tokoleci o gɔɔn ataran looc o, ma waanice ataltowu niiga vooritine onin ŋinbaal miliny e. ³⁶ Bar zin naana alya kanye bacoi ci adikir kujuk Jɔn. Ma kaala ci kagoon naana o kaal ci anyan baaba aneet ka kutugu. Mazin kaala nicigi bacok cigan gi, ma ayelzakun igeet gi o itoonanan baaba aneet. ³⁷ Ma baaba o itoonanan aneet niini alya bacoi can. ŋaan niiga iziiyit molok onin, karabɔŋ acinu ŋum onin. ³⁸ Azee zin zɔɔz onine zinzeetine ugooc tɔ, eeci alaŋ atuyan niiga aneet o itoonan niini. ³⁹ Ɔɔtɔ zin di ekeebit waragenya o Joowo, eeci gɔɔn abaabanu niiga anyu ne, Ajowanu roget o abil been neen ŋaatineŋ. Ma waragenya nicigi alya azɔɔz zɔɔz ci akanan aneet. ⁴⁰ Maje bar niiga alaŋ arooŋnyu ivitayan aneet ka ojokta roget.

⁴¹ Alaŋ naana karooŋ titinyon ɔla. ⁴² Ma buk kagayun naana igeet alaŋ arezu Jook zinzeetine ugooc. ⁴³ Naana kakun alaazete o baaba, ma ŋaan agamtawan. Bar mā anyak eet oma ci aku alaazete cin doon, agamanu niiga nɔɔnɔ. ⁴⁴ Ka zin yo utuyɔ ku, mā arezu niiga ŋaati anaatonu eleetine ugooc maany, maje bar naatinet o aku Joowe o adoi tɔr noko alaŋ arooŋnyu o? ⁴⁵ Má abaabanu kizik bar tiŋeere kako kakɔlakun naana igeet rooni ŋaati baaba. Bar zin ako akɔlakun tiŋeere igeet rooni Mosis o atuyu niiga nɔɔnɔ zinzeeti ugooc. ⁴⁶ Má da didi utuweec zɔɔz o Mosis, utuyan waan buk aneet, eeci Mosis eteyeedun zɔɔz o akanan aneet. ⁴⁷ Mazi yo ma ŋaan agamta zɔɔzok o ayeet niini o, ka zin agamta zɔɔzok ci kaduwakuŋ naana o ku?”

Adayiz Yesu ɔl ci meele

6 ¹ Ma vurte nice abaayiz Yesu liil o Galili ook baagita. (Kazi liil nico zaar ne Tiberas.) ² Ma ano kɔle ci appe nɔɔnɔ, eeci icinit niigi kaal o atɛet ɔl biye baal agɔɔn niini arogi ɔl o amɔɔr e. ³ Otoodit ni Yesu been nuyak ogin be taden, ma avɔ aavtiz loota ŋinaante. ⁴ Maje iiteni o gɔɔn anyayi ɔl o Juz loten uneŋ vardaŋinto izi aɔn. ⁵ Mazi adɔŋ Yesu ɔɔ, acin kɔle ci meel avunak nɔɔnɔ. Ijinun ni Pilip enek ne, “Kayo kataalta dayiin ci aleenɔ ki ɔl nicoko dook ŋaa?” ⁶ (Aduwa niini gi nico o arɔɔŋ kicina Pilip. Maje niini laadun aga gi ci ka kutugu nɔkɔ.)

⁷ Ma abedeke Pilip nɔɔnɔ anek ne, “Arɔɔŋ guruc ceen kaboot ram ka nuun kojowa ɛeti codoi ŋaatineŋ dayiin ci miliny.”

⁸ Ma anek Andoru ween nuyai onin een gɔtɔni Saiman Pitɔr ne, ⁹ “Anyak logo ci anyak ɔken ceen tur kibeem kuluk ci miliny een ram ŋaato. Ka zin yo dayiin ci miliny ter noko kutuguwek ɔl ci meelik noko naa?”

¹⁰ Ma anek Yesu nɔɔgo ne, “Anycek ɔl kaavtiyo loota.” Maje ŋinita ŋinti aliz anyak arte ci colai. Aavtiyo ni ɔl loota. Maje ɔl nici dook een eet amɔtɔ lak tur lelen tur (5000). ¹¹ Odoma ni Yesu ɔken, ma anyek Jook zany, ma anyek nuyak ogin ka keŋeryek ɔl. Ma adoma bodo kuluk, ma anyek ɔl ewe. Ma adake ɔl dook zɛe ma anyer. ¹² Mazi ook ipiiyante ɔl dook, enek Yesu nuyak ne, “Uluta dayiin ci anyigjai o kɔkɔm ci ooŋneku looc.” ¹³ Ma alota niigi ŋodota ci anyigjai o zɛe makacin ibitizit gilanya amɔtɔ ram ŋodotaye ci anyigjai ɔkene ween tur adak ɔl e.

¹⁴ Mazi avɔ acin ɔl gi ci abiirni nɔɔgo ooti agɔɔn Yesu noko, izito ne, “Izi didi te nicini nyakaŋan baal ka kiiyak looc e neen.”

¹⁵ Mazi ako aga Yesu arɔɔŋ niigi kagamit nɔɔnɔ ka kanycek kizi alaan dɔyiza, itiŋa ook biyene niini doon.

Awo Yesu maam tadana

¹⁶ Ma yomana ɔɔt nuyawa ogine liila. ¹⁷ Ma avɔ atɔɔt kavool, ma abaayiz liil ka kɔɔt Kapernama. Mazi ŋaan awo liil keŋa nɔkɔ, izi looci baalin. Maje Yesu ŋaan kurum nɔɔgo. ¹⁸ Maje ŋɔɔti ci appe ivaan, ma ayelyelan maam ɔɔtɔt ele. ¹⁹ Mazi ŋaan awo niigi liil keŋa nɔkɔ, icinit niigi Yesu awoya maam tadana iima nɔɔgo. Anyayit ni niigi ŋoliin ɔɔtɔt ele.

²⁰ Ma anek Yesu nɔɔgo ne, “Má aŋolinu looc! Aneeta gi.” ²¹ Ma atalne niigi, ma atoodek nɔɔnɔ kavool. ŋjintimiliny nɔkɔ urum kavooli dɔwɔn ci ŋin ona avunak niigi laadun e.

Arɔɔŋ ɔl Yesu

²² Ma ŋeeretine co icinit kɔle baal ooŋnonek looc liil baagita e ɔɔtɔ kavooli baal abil ŋinaante e. Maje niigi aga ŋaan Yesu korkorit been nuyak ogin kavoole nice, bar aga otɔŋtek niigi nɔɔnɔ looc. ²³ Maje bodo kavooleta ogene avu looce o kazi Tiberas zɛe ma avu aɔŋɔz liiltok ŋinbaal adayi ɔl ɔken baal anyek nɔɔgo Yesu ŋaabaal anyeke rak niini Jook zany e. ²⁴ Mazi avɔ acin ɔl Yesu kibeem nuyak ogin azeetɔ ŋinaante, otoodit niigi kavoolet nicoko ɔɔt Kapernama ka kɔɔt korooŋit Yesu.

Yesu niini ɔkoc ci rogeto.

²⁵ Mazi avɔ ajowa niigi Yesu liil baagita, enektek nɔɔnɔ ne, “Alaan o demziinto, akunai ŋinito waŋa?”

²⁶ Ma abedeke Yesu nɔɔgo anek ne, “Didile kaduwakuŋ igeet, alaŋ niiga arooŋnyan aneet giye ci agayu kaal baal kagoon atɛet ɔl biye e, bar arooŋnyan o giye ci ɔken baal adaku zɛe ma anyernu e. ²⁷ Má aliŋliŋnyu zin dayiin o gɔɔn ame, bar iliŋliŋit dayiin o eel kodot ween roget o abil been neen. Nici zin dayiin o ka tiŋeere kanyun ŋeerti Eeto igeet neen, eeci agama Jooi ween baatinai liŋliŋon onin.”

²⁸ Ma ajin niigi nɔɔnɔ anek ne, “Mayo zin kutuguza gitaz ci arooŋnyet Jooi ageeta kutuguza o?”

²⁹ Ma abedeke Yesu nɔɔgo anek ne, “Liŋliŋon o Joowo arɔɔŋ ŋaatonooŋ neen ci atuyu eet o itoona niini nɔɔnɔ.”

³⁰ Ma abedeke niigi nɔɔnɔ anek ne, “Inoko gitaz ci agoon atɛet ɔl biye kacina ka kanyet kutuyin ineet o? ³¹ Baale adak jijitigaacak dayiin o kazi mana balala kiyo aduwa waragewi o Joowo azi ne, Anyek baale niini nɔɔgo ɔken ci tammu tadenu kadayit.”

³² Ma abedeke Yesu nōwō anek ne, “Didile kaduwakuŋ igeet, ma ɗokoc baal adaku aku tamma e, alaŋ een Mosis neen o anyuŋ igeet, bar baaba neen o anyuŋ igeet. Inoko zin bar anyuŋ niini igeet ɗokoc ween didi o aku tammu tadena. ³³ Eeci ɗokoc o anyuŋ Jooi neen o akunak looc tammu tadena ka kanyek looc roget.”

³⁴ Ma abedeke niigi nōwō anek ne, “Alaan, nyet zin da gōon ɗokoc nico tup nōkō.”

³⁵ Ma anek Yesu nōwō ne, “Aneeta neen o keen ɗokoc o rogeto. Ma eeti ci akunakan aneet alaŋ bodo nōwō adak magiz. Ma eeti ci atuyan aneet alaŋ bodo nōwō aruk kōr been neen. ³⁶ Zin kiyo uyene kaduwakuŋ igeet ka icintaŋ aneet e, bar ŋaan utuyaŋ nōkō. ³⁷ Mazin eeti o anyan baaba aneet ŋaan akunakan. Ma eet ci akunakan aneet alaŋ naana katooi. ³⁸ Eeci kakun naana tammu tadena looc o ka kiiya kutugu gi o arōŋ eeti o itoonanan aneet, alaŋ ka kiiya kutugu gi ci ɗɗ can doon. ³⁹ Gi zin o arōŋ baaba o itoonanan aneet neen ce. Aroŋnyan niini aneet calaŋ kakuluz eet codoi ole o anyan niini aneet. Bar abon kaŋaane naana nōwō daayiza iitene ci aŋorneke lōoci e. ⁴⁰ Arōŋ eeti o itoonanan aneet ol dook o acin ŋeerin, ma atu nōwō, kojokta roget o abil been neen. Ŋaan zin kaŋaane naana nōwō iitene ci aŋorneke lōoci e.”

⁴¹ Enico otoŋomit ol o Juz Yesu, eeci azi ne, Niini ɗokoc ci akunak looc tammu tadena. ⁴² Ma anō ne, “Ma dim nici alaŋ een Yesu ween ŋeerti Josev neen o kaga naaga dook baatin kibeen yaatin o? Azi zin ne, Kakun tammu tadena kakunai looc o, ku?”

⁴³ Ma anek Yesu nōwō ne, “Otoŋit ŋomtiin cunooŋ o. ⁴⁴ Akōm eet ci akunakan aneet, dooke coma anyakaan nōwō baaba o itoonanan aneet, ka zin kitiŋawi naana nōwō iitene ci aŋorneke lōoci e.

⁴⁵ Ayeet baale nyakaŋaneta zōz ci azi ne, Ademez waanma Jooi ol dook. Ma eeti ci azii baaba, ma edemze niini ŋaatin, akunakan aneet. ⁴⁶ Alaŋ zin bar zōz nico akati keŋ cine gi ci anyawun eet ci icinun baatinai, bar eet o aku Joowa neen o icinun nōwō. ⁴⁷ Didile kaduwakuŋ igeet, ma eeti ci atuwe ajowa niini roget o abil been neen. ⁴⁸ Zin aneeta neen o keen ɗokoc o rogeto. ⁴⁹ Baale jiiitugooce adayit dayiin o kazi mana baal iina tammu tadena balala e, ma bar niigi waanice ŋaan adaai labak. ⁵⁰ Mazin bar nicini ɗokoc o akunak looc tammu tadena ka kadak eeti ci deer, ma alaŋ bodo adaai. ⁵¹ Keen zin naana ɗokoc o rogeto o akunak looc tammu tadena neen. Ma eeti ci adak ɗokoc nico, orok niini izi neen. Ma ɗokoc ci kanyi naana nōwō o ele onan kanyi looc ka kojoktai ol roget neen.”

⁵² Zin zooze nico adaŋto ol o Juz niigi maany bornet nōŋa anō ne, “Ma dim eeti nici ka kanyet ele cino kadayit ku?”

⁵³ Ma anek Yesu nōwō ne, “Didile kaduwakuŋ igeet, mā alaŋ adaku ele ci Ŋeerti Eeto o, ma alaŋ awudu biye ogin, alaŋ ajowanu roget o abil been neen. ⁵⁴ Ma eeti ci adak ele can o, ma awot biye cigan o, ajowa niini roget o abil been neen, ma kaŋaane katin naana nōwō korok iitene ci aŋorneke lōoci e. ⁵⁵ Eeci ele cane o dayiin ween didi, maje biyeta cigane o koden ween didi. ⁵⁶ Ma eeti ci adak ele can o, ma awot biye cigan o, aavi niini ŋaatan, ma kaave naana ŋaatin buk. ⁵⁷ Zin baaba o itoonanan aneet neen o anyek roget ol dook, ma anyan buk niini roget aneet. Mazin buk gole nico kanyi naana roget ol o adak ele onan. ⁵⁸ Nici zin ɗokoc o akunak looc tammu tadena neen. Alaŋ atobō niini kibeen ɗoken o kazi mana baal adak jiiitugooce, ma bodo adaai labak e. Mazin eeti ci adak ɗokoc nico ojowa niini roget o abil been neen.”

⁵⁹ Ma kaal nicoko aduwa Yesu ŋaati ademzi ol ceeze o lotento kuture o kazi Kapernam e.

Zōz o roget o abil been neen

⁶⁰ Mazi avō azii nuyawa ci meel nuyawe ogin zōz nico, izito ne, “Demziin nici adōi kak, ka zin yo tedec kiziiik ŋene?”

⁶¹ Agawun ni Yesu zōz ci aŋōmtōn niigi noko niini doon. Ma anek nōwō ne, “Izi igeet zinzeeti gerze giye nico? ⁶² Ma tiŋeere ma acinu Ŋeerti Eeto amiironek tammu taden ŋinbaal aave niini laadun e ka kibil ku? ⁶³ Anyaa zin roget Vōŋizi o Joowo. Maje dōyizi ci eet ci deer gi ci labak. Mazin zōzowa ci kaduwakuŋ naana o anyaakuŋ igeet Vōŋiz kibeen roget. ⁶⁴ Bar zin ol ogene ŋaatunooŋ alaŋ atuwe.” (Ma Yesu niini laadun kinatamma e aga ol o tiŋeere alaŋ atuwe kibeen eet o ka kiiya kataalōi nōwō nōkō.) ⁶⁵ Ma azi Yesu ne, “Gi zin neen o kanekuŋ ne, Akōm eet ci akunakan aneet, dooke coma akōlak nōwō gōl ci ka kiiyakan o baaba e.”

⁶⁶ Ma giye nico imiirye nuyawa ci meel nuyawe ogin ki vurut alaŋaan arōŋ korkorit ki nōwō. ⁶⁷ Ma ajin Yesu nuyak ogin een amōto ram anek ne, “Aroŋnyu buk niiga ɗōz?”

⁶⁸ Ma abedeke Saiman Pitōr nōwō anek ne, “Manyi, ka koota ŋaati ŋene? Roget o abil been neen anyei niina. ⁶⁹ Kutuyin naaga itoonnyai niina Joowa.”

⁷⁰ Ma abedeke Yesu nōwō anek ne, “Alaŋ een aneet neen ci kaŋeranuŋ igeet ci eeginu amōto ram noko? Bar anyak zin eet codoi ŋaatunooŋ ceen Loryen.” ⁷¹ Aduwa niini gi nico o ariik niini Judaz ween ŋeerti Saiman Iskariat baal ka kook kataalōi nōwō e, ma niini waanice nuyai codoi nuyawe o Yesu een amōto ram.

Yesu kibeen gōtōngi

⁷ ¹ Ma vurte nice otono Yesu Galili doon. Alaŋaan arōŋ keērōn kook Judiya, eeci alaata o Juz arōŋ kuruyit nōwō ŋinaante. ² Maje iitene o gōon aadane ol o Juz ceezi baal abaai niigi balala e izi ajōn. ³ Ma anek gōtōngija nōwō ne, “Toŋ ŋinito. Tō bito Judiya ka kōt kicinit nuyawa ugune kaal cugun agoon o. ⁴ Akōm eet ci arōt liŋliŋōn cin mā arōŋ niini ka kagawe juruŋ. Zin giye o agōone kaal nicoko abon ayelei ele ol dook loota ka kagayin niigi ineet.” ⁵ Aduwa niigi gi nico o, eeci ma een nuun nōwō ele ween gōtōngi ŋaan buk kutuwit nōwō nōkō buk.

⁶ Ma abedeke Yesu nōwō anek ne, “Ŋaan bai iitene onane kiiya, olla ŋaatunooŋ iinya dook abon labak. ⁷ Ma ol o loocu alaŋ amarninuŋ igeet, bar amarninan niigi aneet, eeci kabōrai naana nōwō kaal o ger gōon agōon niigi. ⁸ ɗōto niiga lotenta labak. Alaŋ naana kakō, eeci ŋaan iitene onane kiiya.” ⁹ Aduwa niini gi nico, ma aavi rak Galiliya.

Ademze Yesu ŋaao lotento

¹⁰ Mazi akō avō gōtōngija loten Jerusalema, unuwun bodo buk niini nōwō vurta calaŋ ayeizak ele ol. ¹¹ Maje alaata o Juz arōŋ nōwō ole ci ona avunak loten o. Ma ajinō anō ne, “Eet we inoo?” ¹² Ma aŋōmtō ol ogen anō ne, “Niini eet ci abon.” Maje ceegi anō ne, “Ku? Alaŋ abon, eeci alabek niini ol tuu.” ¹³ Bar akōm eet ci azōz nōwō kiziiye, eeci aŋole niigi alaata o Juz.

¹⁴ Mazi ŋaan kidicai iinya o lotento nōkō, ook Yesu kaluwawe o ceez o Joowo, ma akō ademze ol. ¹⁵ Mazi akō azōz niini, ibiirit alaata o Juz ooti ɗōt ele, ma anō ne, “Ma eeti nici aga kaal nicoko dook ku maŋaan kedemezo o?”

¹⁶ Ma abedeke Yesu nōwō anek ne, “Ma kaala ci kademzekuŋ naana igeet o alaŋ een cigan, bar kaal ci eet o itoonanan aneet.

¹⁷ Ma zin eeti o arōŋ kutugu gi o arōŋ Jooi, ŋaan aga niini mā een kaala ci kademzekuŋ igeet o kaal ci avu Joowa, karabōŋ bar

kazooz naana oowe can doon. ¹⁸ Bar zin gōon ɛeti ci azōōz dōyize ci ɛle cin doon, arōōj niini kojowa titinyon ci ɛle onin. Maje bar ɛeti ci aroōjek titinyon eet o itoona nōōnō, azōōz niini gi ween didi, ma akōm gi ci avōlɔa.

¹⁹ Baale ɲaan kanyuɲ Mosis igeet lotinok o Joowo, ma bar akōm ɲaatunooɲ eet codoi ci agama. Aroōɲnyan zin uruktaɲ aneet kadaak o naa?”

²⁰ Ma abedeke kōle nōōnō anek ne, “Anyei niina Loryen alya. ɲeneen ci te arōōj kuruyin ineet o?”

²¹ Ma abedeke Yesu nōōgō anek ne, “Iiten baale anyak gi codoi adikir kagoon, ma abiirnuɲ igeet dook ooti. ²² Baale uduwayuɲ Mosis igeet zōōz o teedinto. Mazin bar buk nica alaɲ een zōōz ci Mosis, bar zōōz baal jijitugooc, ma waanice gōon ateedu dōl iitene ween Sabit. ²³ Mazi da gōon ma abon ɲaatunooɲ labak ɲaati ateedine dōlya iitene ween Sabit ka calaɲ abaci lotinok o Mosis, abornekaɲ zin aneet nōj ɲaati karogze eet iiten ceen Sabit o naa? ²⁴ Mā apaku zin zōōzok olla giye ci akat ɛle eci bitaalu, bar apayit zōōz gole ci abil tōp.”

Yesu niini Kiristo gi?

²⁵ Ma azi ɔl ogene ole o Jerusalem ne, “Ma dim nici alaɲ een eet o arōōj alaata nōōnō kuruyit kadaak e neen? ²⁶ Icinit di ɲaati azōōzi kōla labak, ma akōm eet ci aduwak nōōnō gi ci ger. Agaac bōj alaata izi didi niini Kiristo o ka kiiya neen? ²⁷ Ku zin yo koca? Ma kaga naaga dook ɲinti akuni ɛeti nici o? Bar zin tiɲeere ma aku Kiristo, akōm eet ci aga ɲinti katin akuni niini o.”

²⁸ Mazi akō ademz Yesu ɔl kaluwawe o ceez o Joowo, egereny niini molowe ci appe izi ne, “Inoko dim niiga agayaɲ aneet ɲeneen? Yo buk inoko ɲinti kakune o agayu? Alaɲ zin naana kakun dōyize can doon. Itoonanan aneet baaba ween Jook ween didi. Ma alaɲ niiga agayu nōōnō. ²⁹ Bar zin naana kaga nōōnō, eeci kakun naana ɲaatin. Nōōnō neen o itoonanan aneet.”

³⁰ Zin giye nico orooɲit alaata ka kagamit nōōnō, bar akōm eet ci anim kuum nōōnō, eeci ɲaan iiteni onine kiiya. ³¹ Maje ɔl ci meel utuweec nōōnō, ma anō ne, “Ma dim tiɲeere ma aku Kiristo, agōon kaal ci atɛet ɔl biye kujuk ci agōon ɛeti nici o?”

Itoon ɔl o Parici takirnya kōt kagamit Yesu

³² Mazi avō azii ɔl o Parici kōle arōmōt Yesu nōkō, itoonit niigi kibeena alaata o ceez o lotento takirnya kōt kagamit nōōnō. ³³ Ma azi Yesu ne, “ɲaan rak karome ki igeet ɲintimiliny. Zin ɲaan kako ɲaati baaba o itoonanan aneet. ³⁴ Aroōɲnyan waanma niiga aneet, ma bar alaɲ ajowanay, eeci ɲinti tiɲeere kaave naana e alaɲ niiga animnyu ɔtō.”

³⁵ Ma anō alaata o Juz niigi maany ne, “ɲindaɲ ci dim arōōj niini ka kooyi zee ma alaɲ kanim naaga kojoktai nōōnō o? Arōōj bōj kook loocowe o abaa ɔl ween Garik ka kook kedemez nōōgō? ³⁶ Uyene rak azi ne, Katin karōōj naaga nōōnō, bar alaɲ kajowa. Ma bodo azi ne, Ma ɲinti ka kooyi niini o alaɲ kanim naaga kōtō. Ma zōōz nici akati keɲ cine gitaz?”

Azōōz Yesu zōōz ci akati maam o rogeto

³⁷ Mazi akō een iiten o aɔorneke loten o adikir, itiya Yesu jena, ma azōōz molowe ci appe azi ne, “Mā alam eet ci aruk kōr, anyek nōōnō kiiyayan ka kowode. ³⁸ Kiyo azi waragewi o Joowo ne, Mā anyak eet ci atuyan aneet, zinize cino ariik maama ci rogeto.” ³⁹ Zin Yesu ɲina azōōz zōōz o akati Vōɲiz o ka kanyek Jooi ɔl o atu nōōnō. Maje waanice Vōɲizi ɲaan kanyozozek ɔl, eeci Yesu ɲaan buk kitiya daayiza ka kanyozozek nōōnō diɲɲiɲoni.

Enerto ɔl korgena

⁴⁰ Mazi avō azii ɔl ogen zōōz o Yesu, izito ne, “Didi ri ɛeti nici nyakaɲan ci Joowo gi.” ⁴¹ Maje ɔl ogen anō ne, “Niini ri Kiristo gi.” Bar bodo ogen azi ne, “Alaɲ Kiristo ka kiiya Galiliya. ⁴² Azi waragewi o Joowo ne, Aku katin Kiristo dolene ci dōl o Devid. Aritai zin katin niini kuture o kazi Bezilem baal abaa Devid e.” ⁴³ Zin giye nico enerto ɔl korgena giye ci akati Yesu. ⁴⁴ ɔl ogen arōōj kagamit nōōnō, bar akōm eet ci ataadek nōōnō aziit kagam.

Alaɲ alaata o Juz atuwe

⁴⁵ Mazi avō amiiri takirnya, ɔt ijinit alaata o ceez o Joowo kibeena ɔl o Parici nōōgō enektek ne, “Alaɲaan anyaanu naa?”

⁴⁶ Ma abedeke niigi nōōgō anek ne, “ɲaan baal reen akōm eet ci azōōz kiyo ɛeti nici o.”

⁴⁷ Ma abedeke ɔl o Parici nōōgō anek ne, “Alabawuɲ niini igeet buk. ⁴⁸ Inoko alam eet codoi ɲaatinaɲ karabōj een alaate o Juz ci atu nōōnō tō? ⁴⁹ Ma ɔl ci azii zōōz cin o alaɲ aga niigi lotinok o Mosis. Inoko zin niigi anyak toriin o Joowo.”

⁵⁰ Ma anek ɛeti codoi ɲaatineeɲ ci kazi Nikodimos baal rak akō ɲaati Yesu e nōōgō ne, ⁵¹ “Gōon lotinowa ogaac alaɲ anyet kapaktek eet gerzitin maɲaan kiziiyit gi ci aduwa niini otoge onin ɛle.”

⁵² Ma abedeke niigi nōōnō anek ne, “Awaan! Een buk niina eet ci Galili? Keep zin di warage o Joowo ka ga akōm laadun nyakaɲan ci ka kiiya Galiliya.” ⁵³ Enico azaantozek ɔl dook korogjok ugeecik.

ɲaa ci agamnyi zoocmaza

8 ¹ Ook ni Yesu biye o kazi Kinjiroc. ² Ma ɲeere ririwōna abadaak kaluwa o ceez o Joowo. Ma avunak kōle ci meel nōōnō, ma aavi niini loota, ma ademz nōōgō. ³ Ma anyaa alaata o ademz ɔl lotinok kibeena ɔl o Parici ɲaa ci agamnyi zoocmaza. Ma avu anyek niigi ɲaa nico kibil nōōgō dook ɲuma. ⁴ Ma anek Yesu ne, “Alaan o demziinto, nicini ɲaa ci agamnyi zoocmaza. ⁵ Ma zin lotinowa o Mosis azi ne, ɲaa ci agamnyi kiyo nici abon avac ɔl nōōnō biyene zee ma adaai. Mayo zin inoko niina azi giye nico ne?”

⁶ Aduwa niigi gi nico o, eeci arōōj kedetit Yesu ka kojokta gōl ci agami nōōnō ka kōkōltake rooni. Bar Yesu ululi, ma ayeet looc komolita. ⁷ Mazi ɲaan ajin niigi Yesu nōkō, adōj niini ɔ, ma anek nōōgō ne, “Mā anyak ɲaatunooɲ eet ci ɲaan kabaca baciinok, anyek rak nōōnō kodoma be ɔwa ka kavac ɲaa nico.” ⁸ Zin ulule bodo, ma ayeet looc komolita.

⁹ Mazi avō azii niigi zōōz nico, iniyit ɔtōzō niigi dook kidicilim codoi codoi, akana ole o adikir zee been o miliny buk. Makacin otōɲtek niigi looc Yesu ki ɲaa we doon. ¹⁰ Mazi akō adōɲa Yesu ɔ, ɔkōma eet ci acin. Ma anek niini ɲaa nico ne, “ɔl oke ɲaa? ɔkōma ɲaatineeɲ eet codoi aavi ka kapayeyin gerzitin?”

¹¹ Ma abedeke ɲaa nōōnō anek ne, “Akōm kina, alaan.”

Enek ni Yesu nōōnō ne, “Alaɲ zin buk naana kapayekin ineet gerzitin. Bitō zin, ma ɲaan bodo abaca oɲe.”

Yesu niini vooritin ci loocu.

¹² Ma azoozek Yesu ol bodo anek ne, “Keen naana vooritin ci loocu. Mā anuyan eeti aneet, anyak niini vooritin o rogeto, ma alaj bodo niini awo muura.”

¹³ Ma anek ol o Parici noono ne, “Inoko niina oobi kaal ci akati ele unun maany, ma zin kaala ci ooba o alaj een didi.”

¹⁴ Ma abedeke Yesu noogo anek ne, “Mayo nuun koobi kaal ci akati ele onan maany, kaala ci kooba o kaal ceen didi. Eeci kaga naana njino kakune been njinti kakoye. Maje bar niiga alaj agayu njino kakune been njinti kakoye. ¹⁵ Apaku niiga zoosok gole o eet o deer, maje naana akom eet ci kapaye gi ci ger. ¹⁶ Bar mā anyak gi ci kapai naana, payiin cane o payiin ceen didi, eeci alaj een aneet doon ci kapai zozz nico o, bar kapaka naana ki baaba o itoonanan aneet. ¹⁷ Ayeedi lotinowe ugooc zozz ci azi ne, Mā een bacowa ram, aleemyai zozz nici. ¹⁸ Zin keen naana baco ci ele onan maany, ma buk baaba o itoonanan aneet, niini baco can buk.”

¹⁹ Ma ajin niigi noono anek ne, “Aavi baatune nya?”

Ma abedeke Yesu noogo anek ne, “Alaj niiga agayan aneet, ma alaj buk agayu baaba. Inoko te agayan aneet, agayu waan baaba buk.”

²⁰ Ma kaal nicoko aduwa Yesu jaati ademzi ol kaluwawe o ceez o Joowo nya abilni loidoj o mucu. Ma akom iiten nice eet ci agam noono, eeci jaan iiteni online kiiya.

Aduwak Yesu ol zozz ci akati ele onin

²¹ Ma bodo anek Yesu noogo ne, “Iima jaan kawo naana koojnekuj looc njina. Zin katin aroonjany niiga aneet, bar alaj ajowanaj, ma adajnu niiga waanma jaan anyaku oje noko. Ma njinti kakoye naana, alaj niiga avoyu.”

²² Ma ano alaata o Juz ne, “Ma dim azi ne, Alaj naaga kanim kooto jaati akoyi niini o. Arcoj boj ka kuruk ele kadaak?”

²³ Ma abedeke Yesu noogo anek ne. “Eeginu niiga ol ci loocu njina, maje naana keen eet ci tammu tadenu. ²⁴ Gi zin ci ona kanekuj ne, Adajnu waanma niiga jaan anyaku oje o neen. Zin didi niiga waanma adajnu jaan anyaku oje noko mā alaj atuyan niiga aneet o keen aneet.”

²⁵ Ma ajin niigi noono anek ne, “Ma niina ineet njeneen?”

Ma abedeke Yesu noogo anek ne, “Gi neen ona kuduwayuj rak uyen oowa e. ²⁶ Kanyei zoosok ci meel karoj kuduwayuj, ma kapayekuj igeet. Ma eeti o itoonanan aneet alaj niini avolaj. Zin olla naana kaduwai ol o loocu kaal o kaziinja jaatin.”

²⁷ Ma jaan niigi kagaac aduwak Yesu noogo zozz ci akati baatin o. ²⁸ Enek ni Yesu noogo ne, “Tijeeere ma odonju niiga Jjeerti Eeto keete ween talakec, jaan agayanu keen naana aneet neen. Zin enice jaan agayu akom naana gi ci kagoon doyize can doon, bar kaduwa zozz o ayelzakan aneet baaba. ²⁹ Ma niini o itoonanan aneet aavi jaatan. Ma alaj uujnan niini aneet kaavu doon, eeci goon kagoon naana gi o atal niini tup.”

³⁰ Mazi ako aduwa niini kaal nicoko, utuweec ol ci meelik noono.

Dol ci dol o Ibrayim

³¹ Enek ni Yesu ol ci atu noono o ne, “Mā azuunu demziin can o, izitu didi koca niiga nuyak cigan. ³² Jaan zin agayu niiga zozz ween didi, ma zozz ween didi jaan ooganuj igeet mirokzete o baciinowu.”

³³ Ma abedeke niigi Yesu anek ne, “Keegina naaga dol ci dol o Ibrayim. Jaan baal reen jaan kizita mirok ci ol oog. Mayo zin kej jar ci ane ne, Jaan ooganu mirokzeta o?”

³⁴ Ma abedeke Yesu noogo anek ne, “Didile kaduwakuj igeet, ma eeti ci abaca baciinok niini miroi ci baciinowu. ³⁵ Ma goon laadun miroiti alaj een eet ci korgu kodot, bar logo o aritak korok neen o abaak niini ol kodot. ³⁶ Mā ooganuj jeerti Joowo baciinowe, ooktewu koca niiga didi. ³⁷ Jedet kagayuj naana igeet noko eeginu dol ci dol o Ibrayim o. Ma bar aroonju uruktaj kadaak, eeci alaj agamanu demziin onan. ³⁸ Kazooz zin naana kaal o ayelekan aneet baaba, maje niiga agoonu kaal o aduwakuj igeet baatunooj.”

³⁹ Ma abedeke niigi noono anek ne, “Baatinaaj neen Ibrayim.”

Ma anek Yesu noogo ne, “Mate didi iziti dol ci Ibrayim, agoonu waan kaal ci abon kiyo baale niini e. ⁴⁰ Bar zin naana kaduwakuj igeet zoosok ween didi baal kaziinja naana Joowa, ma bar aroonju uruktaj kadaak. Mazin baale Ibrayim alaj agoon kaal ci eel noko. ⁴¹ Bar zin niiga agoonu kaal o agoon baatunooj.”

Ma abedeke niigi noono anek ne, “Alaj naana karitana tuuwa. Kanyaka baatinaaj codoi tor noko ween Jook.”

⁴² Ma anek Yesu noogo ne, “Kizi da Jooi didi baatunooj, areezaj waan niiga aneet, eeci kakun naana jaatin, ma inoko kaave njina. Alaj kakun doyize can doon, bar noono neen o itoonanan aneet. ⁴³ Zin alaj aziijnu kaal ci kaduwakuj o naa? Agoonu noko o, eeci alaj animnyu uzuuti zozz can o. ⁴⁴ Eeginu zin niiga dol ceen baatunooj neen Loryen, ma aroonju oneec kaal o arcoj niini. Niini laadun kinatamma e eet ci monyento. Ateedo niini ki leeminet zozz, eeci akom jaatin laadun leeminet. Aduwa goon niini voloj, eeci voloj keer cin laadun. Niini volojnyoi, ma een baati volojnyowu. ⁴⁵ Maje naana kaduwakuj zozz ween didi. Gi zin calaj atuyan niiga aneet o neen. ⁴⁶ Jjeneen inoko jaatunooj ci agawekan aneet gi ci kabaci? Zin mā kaduwa gi ween didi, alaj atuyan naa? ⁴⁷ Ma eeti o aku Joowa azii niini zoosok o Joowo. Ma zin niiga alaj aziijnenu o, eeci alaj eeginu dol ci Joowo.”

Yesu kibeen Ibrayim

⁴⁸ Ma anek ol o Juz Yesu bornet noja ne, “Een niina eet ceen Samariyen ci anyei Loryen alya.”

⁴⁹ Ma abedeke Yesu noogo anek ne, “Akoman Loryen alya. Kadindjan naana baaba, maje bar niiga alaj adindjan aneet. ⁵⁰ Alaj karojei naana dindjon ele maany, bar Jook neen o aroonkan aneet dindjon, ma apayek niini gerzitin ol o abornan aneet. ⁵¹ Didile kaduwakuj igeet, mā azii eeti zozz can o, alaj niini adaai been neen.”

⁵² Ma anek ol o Juz noono ne, “Inoko zin kagayin didi anyei niina Loryen alya. Mayo nuun een jittinaaj Ibrayim kibeen nyakananet baale adaayito. Maje niina azi ne, Mā anyak eet ci azooni zozz can o, alaj adaai been neen. ⁵³ Ma dim niina ineet njeneen? Baale baatinaaj o kazi Ibrayim kibeen nyakananet adaayito labak. Mazi yo niina adindjij juk noogo?”

⁵⁴ Ma abedeke Yesu noogo anek ne, “Mate waan kidindjan ele cano naana maany, alaj koca dindjontu cane o een didi. Bar zin adindjan aneet baaba o goon aniyu niiga ne, Jook cunooj. ⁵⁵ Bar zin niiga jaan agaac noono, maje naana kaga noono. Mate kizi

Yesu niini eet ci towawiinto abon

10¹ Ma anek Yesu nōōgō ne, “Didile kaduwakuŋ igeet, ma ɛeti calaŋ akunak teeny eecito araana, ma bar atōoda dōda ŋin oma, ma ako teeny eecito, niini agoryai, ma een aamnyoi. ² Maje ɛeti ci akunak teeny araana, niini eet o towawiinto neen. ³ Ma akolek ɛeti o gōon abek teeny eet ci towawiinto noko araan. Ma azii aza ogine molok onin, ma awo niini aza ogin zaar, ma arayin nōōgō ŋaati aduŋni. ⁴ Mazi aduŋnan aza ogin bitaala, ma oontane nōōgō, anowa niigi nōōnō vurta, eeci aga niigi nōōnō molok onin. ⁵ Alaŋ niigi ano eet ci gaga, bar mā een eet ci gaga, avir niigi nōōnō, eeci alaŋ aga niigi molok cin.”

⁶ Aduwak Yesu nōōgō yabziin nico, maje bar niigi alaŋ aga keŋ cin.

⁷ Ma bodo anek Yesu nōōgō ne, “Didile kaduwakuŋ igeet, Keen naana araan o teeny o azawu. ⁸ Ma ol dook baal avu iŋaan naana kiiya e niigi agoryak, ma een aamnyok. Bar zin aza ŋaan kiziiyit nōōgō. ⁹ Keen zin naana araan, ma ɛeti ci aku ŋaaten aneet ɛelyai. Ma aku niini teeny, ma adun, ma ajowa ŋinti agewi. ¹⁰ Gōon laadun agoryaiti akunak niini gorziin ki toŋdiin kibeen targanyitin. Zin bar naana kakun ka kiiya kanyek nōōgō roget korogit juruŋ.

¹¹ Keen naana eet o towawiinto abon. Ma gōon ɛeti ci towawiinto alaŋ aŋoli daayiz ci aruwen azaye cigin. ¹² Ma ɛeti ci gōon uuwayi ka kuruktozek vōyita alaŋ een niini eet o azawu neen. Mā acina niini kelaŋ ci aku, ooŋnek niini aza looc, ma avir, ma aku adak kelaŋi aza zee ma azaan. ¹³ Ma ɛeti ci alinliŋ ka kuruktozek vōyita avir niini labak o, eeci alaŋ een aza nici cigin ɛle. ¹⁴ Keen zin naana eet o towawiinto abon. Kaga naana aza ogan, ma buk agayan niigi aneet. ¹⁵ Kiyō agayan baaba aneet, ma kaga naana nōōnō o, buk zin naana kaga aza ogan. Ma kagama daayiz ŋaatineeŋ. ¹⁶ Kanyei buk aza oogi calaŋ ɛel teeny nico. Abon zin kanyaa naana nōōgō buk ka kivita kiziiktan niigi aneet molok onan ka koromte aza dook teeny eecito, ma oowa nōōgō dook ɛeti eecito.

¹⁷ Areezan zin baaba aneet o, eeci kagama naana daayiz. Zin kaga naana ŋaan kaŋaaz daayiza bodo. ¹⁸ Akom eet ci anyak dōyiz ci ka kurukan aneet kadaak, bar kagama daayiz naana oowe onan doon. Kanyei dōyiz ci kadaakne been ci kiŋaane bodo daayiza. Nici zōōz ci aricanekan baaba aneet ka kutugu.”

¹⁹ Zin zooze nico eŋeryō bodo ol o Juz kōrgena. ²⁰ Ma ano ol ci meel ŋaatineeŋ ne, “Anyak inoko ɛeti nici Loryen alya, karabōŋ bar anyak maŋon. Mayo laadun aziŋŋu zōōz cin o naa?”

²¹ Maje ol ogen ano ne, “Akom eet ci anyak Loryen alya ci azōōz nōkō. Anyak Loryenti dōyiz ci anyeke eet ci ruben kicin?”

Abor ol o Juz Yesu

²² Zin iiya iitani o gōon anyayi ol o Juz loten o aadane niigi iiten baal eteenyoi bodo ceez o Joowo Jerusalema e. Maje waanice looci izi loōtin. ²³ Ma iitane nice awo Yesu riiwe baal ɛenyca Solomon e. Ma rii nici ajōōz ceez o Joowo. ²⁴ Ma avu aliya ol o Juz nōōnō, ma ajin anek ne, “Ma dim ka kereyowa been inin? Mā een didi niina Kiristo neen, duwayet juruŋ.”

²⁵ Ma abedeke Yesu nōōgō anek ne, “Uyene kuduwayuŋ, bar alaŋ arooŋnyu niiga utuyaŋ. Ma kaala ci kagoon naana zaare o baaba noko ayselza gi o keene naana Kiristo. ²⁶ Bar zin niiga alaŋ atuyaŋ o, eeci alaŋ eeginu aza cigan.

²⁷ Gōon aza ogane aziŋnan molok onan. Ma kaga naana nōōgō, ma anuyan niigi aneet. ²⁸ Kanyi naana nōōgō roget o abil been neen, ma alaŋ bodo niigi adaai. Ma akom eet ci iraananan nōōgō aziite onan. ²⁹ Ma baaba o anyan aneet nōōgō adikir niini ɔōōt kujuk kaal dook, ma akom eet ci anim kiraana nōōgō aziite onin. ³⁰ Zin naana ki baaba kadowina.”

³¹ Ma giye nico everya bodo ol o Juz biyen ka kavacin nōōnō kuruwit kadaak. ³² Ma abedeke Yesu nōōgō anek ne, “Keyeleyuŋ naana kaal o abon meelik avu ŋaati baaba dook. Mazi yo kaale nicoko jaŋ ci arooŋnyu avacaŋ biyene o?”

³³ Ma abedeke ol o Juz nōōnō anek ne, “Alaŋ karoōŋnya kavacin giye ci abon agoon, bar karoōŋnya kavacin o, eeci amomoz Jook. Een niina eet ci deer labak, ma bar anyi ɛle izi Jook.”

³⁴ Ma abedeke Yesu nōōgō anek ne, “Ayeedi waragewe o Joowo gi ci azi ne, Eeginu niiga dōl ci Joowo. ³⁵ Ma kaga naaga laadun waragewi o Joowo aleemnyai nōkō kodot. Awo zin Jooi ol baal anyek niini zōōz onin kiziti dōl cigin. ³⁶ Ma zin bar aneeta aŋgeranan Jooi, ma itoonanan kiiyak looc. Mazi kazi ne, Keen ŋeerti Joowo, bodo aniyu ne, Kamomoz Jook o, ku? ³⁷ Mate waan calaŋ kalinliŋ naana linliŋon o baaba, alaŋ koca agano ŋaati atuyaŋ niiga aneet. ³⁸ Bar zin mā kalinliŋ naana linliŋon o baaba, mayo nuun alaŋ atuyaŋ niiga aneet zooze onan kaduwa, abon atuyi linliŋon onan kalinliŋ, ka agaac aavi baaba ŋaatan, ma kaave naana ŋaatin.”

³⁹ Enico orooŋit bodo niigi kagamit nōōnō, bar iniwun niini nōōgō keberen nōkō ɔōō.

⁴⁰ Imiire ni Yesu bodo abaayiz liil o kazi Jordan, ma ako ŋaabaal oonyi Jōn ol e, ma ako amōn ŋinaante. ⁴¹ Ma ŋinaante ivitak ol ci meelik nōōnō, ma avu ano ne, “Baale Jōn akom kaal ci ateet ol biye agōon, zin bar kaal baal aduwa niini akati eet nico e eelit didi dook tō.” ⁴² Zin waanice ŋinaante utuweec ol ci meelik nōōnō.

Daayiz o Lazaros

11¹ Ma enice anyak eet ci amōr kazi zaar ne Lazaros. Abaak niini kuture o kazi Betani, ma arome niini ki ŋōōnōgi ci kazi Meri been ci kazi Marta ŋinaante. ² Ma Meri nici nōōnō neen baal ka kiiya kuvuut Manyi karacoca, ma eek zōō imane e. ³ Ma itoonek ŋōōnōgi Lazaros Yesu otok ci anek ne, “Manyi, laŋotun unun gōon areez amōr ɔōōt.”

⁴ Mazi ako azii Yesu zōōz nico, izi ne, “Mōrizi nici alaŋ een daayiz, bar ka kanyaak Jook zany, ka zin buk kanyozozek ŋeerti Joowo zanyi.”

⁵ Maje waanice Yesu areez Marta kibeen Meri been Lazaros ɔōōt. ⁶ Bar mazi ako azii niini mōriz o Lazaros, omonun rak niini ŋaati baal aave o iinya ram. ⁷ Ma vurta enek nuyak ogin ne, “Kimiirte di bodo kōōtō Judiya ka kōōtō Betaniya.”

⁸ Ma abedeke nuyawa ogine nōōnō anek ne, “Alaan o demziinto, iiten baale aroōŋ ol o Juz kavacin biyene ŋinaante. Ma bodo inoko aroōŋ ka bitō ŋinaante?”

⁹ Ma anek Yesu nōōgō ne, “Inoko gōon alaŋ anyak waazini eecito ziik amōtō ram? Mazin ɛeti ci awo waaz alaŋ niini adiri, eeci vōr looci. ¹⁰ Mazi awo niini baal, adiri, eeci alaŋ vōr looci. ¹¹ Inoko zin laŋotinai Lazaros ɔōŋ. Karooŋ zin kook kitinŋka kicine.”

¹² Ma abedeke nuyawa ogine nōōnō anek ne, “Manyi, mate ɔōŋ, ŋaan zin ri tedec acine labak.”

¹³ Ma ɔōŋnya ci aduwa Yesu o daayiz o Lazaros neen. Maje bar nuyawa alaŋ aga. Bar abaaban niigi ano ne, “Coma ɔōŋ labak.” ¹⁴ ɔōrak ni Yesu nōōgō enek ne, “Adaawun Lazaros. ¹⁵ Katalne zin naana giye ci akanuŋ igeet, eeci alaŋ kaave waanice naana ŋinaante ka korogoz nōōnō. Ma daayizi nica iina o ka atuyaŋ niiga aneet. Inoko zin kōōtō ŋaatin.”

¹⁶ Ma anek Tomaz ween codengōn gōōnōgi ween nuyak ne, “Korkorit buk naaga dook kibeen nōōnō, ka mā anyak gi ci aku, ka kadaayit naaga dook ki nōōnō.”

¹⁷ Mazi ako arum Yesu looc, amada Lazaros anyawun iinya wec boota. ¹⁸ Maje kuturi ci kazi Betani noko ajonzo ki Jerusalem. ¹⁹ Ma avunak ol ci Juz meelik Marta been Meri ka kivita kozooztek nongoo daayize nico. ²⁰ Mazi ako azii Marta Yesu iya, itinja ook urumek nongoo gol. Maje Meri nyan aavi ceeza. ²¹ Ma anek Marta Yesu ne, “Manyi, waan da aavu njina alaj waan gotona adaai. ²² Bar zin kaga ma ajin inoko Jook olla gi ci aroonj, anyin niini ineet.” ²³ Ma anek Yesu nongoo ne, “Njaan ijaaz tedec gotonu korok bodo.” ²⁴ Ma abedeke Marta nongoo anek ne, “Njedet kaga noko. Njaan ijaaz waanma niini daayiza iitene ci atorneke looci e.” ²⁵ Ma anek Yesu nongoo ne, “Aneeta neen o kanyi ol roget, ma kajaane nongoo daayiza. Ma eeti ci atuyan aneet mayo nuun adaai, arogi bodo. ²⁶ Maje eeti ci nyan arogi, ma atuyan aneet, alaj bodo niini adaai been neen. Inoko atu zozz nico?” ²⁷ Ma abedeke Marta Yesu anek ne, “Ii, Manyi. Kutuwin naana ineet. Een niina Kiristo ween neerti Joowo baal ka kiiyak looc e neen.”

Alu Yesu daayiz o Lazaros

²⁸ Mazi ako adotiz Marta zooze nico, imiire ook otowa Meri ween njoni, ma aku ajomtek nongoo doon gi ci anek ne, “Iiya alaani o demziinto. Awuyin zin niini ineet.” ²⁹ Mazi azii Meri zozz nico, itinja ecodoi noko iyik ook njaatin. ³⁰ Maje Yesu nyan korogjok kurum, bar nyan aavi nyan ona arumeke Marta nongoo gol e. ³¹ Maje ol o Juz ona avu ka kozoozek awoyi Meri e nyan aavtiz ceeza. Mazi acin niigi Meri njaaz taman, ma adun ako bitaala, oneec niigi nongoo, eeci abaaban niigi ano ne, “Ako inoko boote o gotonon e ka kook kutulu njinaante.” ³² Mazi ako arum Meri Yesu, acin niini nongoo, ma akani kozonji looc nongoo njuma, ma anek ne, “Manyi, inoko da aavuto njina, nyan waan gotona kadaak.” ³³ Mazi acin Yesu Meri kibeem ol o Juz alu noko, eteede buk nongoo ziniz zozz. ³⁴ Ma ajin niini nongoo anek ne, “Adayu nyan?” ³⁵ Ma abedeke niigi nongoo anek ne, “Manyi, ija ka cin njinti kadaya o.” ³⁶ Ma ano ol o Juz ne, “Icinit di! Areez niini eet nico zozz.” ³⁷ Maje ol oge ne njaatineen ano ne, “Alaj een eet baal akol eet o ruben kebere e neen? Inoko te komoda eet nico nyan kadaak, alaj waan adaai.”

Injaani Yesu Lazaros daayiza

³⁸ Zin bodo eteede Yesu ziniz zozz ele. Iiyak ni boot ci baal adawin Lazaros o. Maje boot nico anyoogi otogi biye ci appe zozz. ³⁹ Ma anek Yesu ol ne, “Ipikta be nico look otoga.” ⁴⁰ Bar abedeke Marta nongoo anek ne, “Manyi, ame tedec zozz, eeci anyawun niini boota iinya wec.” ⁴¹ Ma anek Yesu Marta ne, “Kuduwayin uyen keneyin ne, Ma atuyan aneet, acin tedec dindjion o Joowo.” ⁴² Mazi ako apiya niigi be, odonj Yesu kebere, ma acin tammu taden, ma azi ne, “Baaba, kanyin zany, eeci gonon azijnan niina aneet. ⁴³ Njedet kagayin noko gonon azijnan niina aneet. Olla zin zozzok nicoko kaduwa o, eeci karonj ol ci eel njina noko ka kutuyo, ma agayan niigi itoonanan niina aneet.” ⁴⁴ Mazi ako odotiz niini njariinte nico, otowe molowe ci appe azi ne, “Lazaros, duna bitaala.” ⁴⁵ Makacin itinja Lazaros, ma adunjak bitaalin. Maje azeena kibeem zozz nyan acabje rumanen noko. Maje bodo rum codoi atakuconek nongoo njum. Ma anek Yesu ol ne, “Dokta rumanen nicoko njaatin ka kotoo.”

Arzonj ol kuruyit Yesu

⁴⁶ Mazi avo acin ol o Juz baal avu azoozek awoyi Meri e Yesu agoon gi nico, utuweec ci meelik njaatineen nongoo. ⁴⁷ Mazi bar ol ogen njaatineen imiire zozz uduktak ol o Parici gi ci agoon Yesu o. ⁴⁸ Mazi azii ol o Parici ki alaati o ceez o Joowo zozz nico, ulute njaatodoi, ma ano ne, “kayo kutuguz gitaz? Eet nico utugu kaal ci meel atee ol biye zozz. ⁴⁹ Inoko ma koonj kilinjilj kaal nicoko noko, atu koca ol dook nongoo. Ma koca avu alaata o Rom, ma zoyk ceez cinai Joowo o, ma buk koca avu atargany looc cinai o dook.” ⁵⁰ Maje njinaante anyak eet cinaanj kazi Kayavas ceen alaan ci ceez o Joowo irkite nice. Itinja ni niini, ma anek nongoo ne, “Akam niiga gi ci agayu been neen. ⁵¹ Alaj agayu abon adaai eeti codoi ola ka calanj adaai ol dook o?” ⁵² Alaj zin bar aduwa niini gi nico oowe cin doon, bar giye baal ene niini alaan ci adikir ceeze o Joowo irkite nice anyewun Jooi nongoo kuduwa gi o ka kiiya kadaai Yesu ka korogoozi ol o Juz dook. ⁵³ Alaj zin bar ka kadaak ole o Juz doon, bar ka buk kiiya kolota niini dol ci Joowo azaanonek loocok o dook kodoyi. ⁵⁴ Zin akati iitene nice ele oroonji alaata o Juz gol ci ka kurukti Yesu kadaak. ⁵⁵ Ma giye nico enice alajaan Yesu awo keyeleza ele Judiya, bar itinja niini ook kuture o kazi Iviram ajonj balal, ma ako amon niini kibeem nuyak ogin njinaante. ⁵⁶ Mazi izi loten o gonon aadane ol o Juz iiten o vardanjinto ajon, zozz ol ci meelik ole o Juz Jerusalem ka koot kutuguzo niigi kaal ugeec gonon toonyento. ⁵⁷ Maje njaato arzonj niigi Yesu. Mazi avo alote kaluwawe o ceez o Joowo, ijinto izito ne, “Mayo dim tedec eeti we aku didi?” ⁵⁸ Ma buk aricanek alaata o ceez o Joowo kibeem ol o Parici ol zozz ci anek ne, “Ma alam eet ci ajowa njinti aave Yesu, abon aku aduwaket ka koota kagamta.”

Avuut Meri Yesu zozz

12 ¹ Mazi nyan eel iinya ceen torkonon zowa nyan kiiya iiteni o vardanjinto, ook Yesu kuture o kazi Bezani njabaal arogi niini Lazaros daayiza e. ² Ma avo agoonek ol nongoo dayiin njinaante, zee anyak ni Marta nongoo dayiin. Maje Lazaros arome kibeem ol ci ona arewa ki Yesu dayiin o dook. ³ Ma anyaa Meri ketezewoc ci anyak karacoc ci kazi narat ci anol madiz zozz ci atalyai guruce ci meelik ger. Ma aku aduuteke Yesu zozz, ma apucpucanek imane. Makacin otongol ceez dook madiz zozz. ⁴ Izi ni azi nuyaiti o Yesu kazi Judaz Iskariat baal ka kiiya kataalbi nongoo e ne, ⁵ “Mate laadun alaj ataaline karacoc nico guruce ci meelik ka kanycek ol o amaati naa?” ⁶ Alaj zin bar aduwa gi nico o giye ci areezi niini ol o amaati, bar aduwa o, eeci een niini agoryai. Ma anyak gonon kaboon o guruce niini.

⁷Ma anek Yesu nɔɔnɔ ne, “Toŋɔ nɔɔnɔ. Agoonekan niini aneet gi nico o ka kidimdimaneyan aneet iiten o dawinto. ⁸Ma ɔl ci amaat o aro menu ki igeet ŋina iinya dook, maje naana alaŋaan bodo karome ki igeet ŋina been neen.”

Arɔɔŋ ɔl kuruyit Lazaros

⁹Mazi avɔ azii ɔl ci meel Yesu aavi kuture o kazi Betani, ɔɔɔ niigi ŋinaante. Alaŋ avɔ niigi ŋinaante o ka kɔɔt kicinɔt Yesu doon, bar arɔɔŋ buk niigi kɔɔt kicinɔt Lazaros baal iŋaani Yesu nɔɔnɔ daayiza e. ¹⁰Makacin abaabanɔt alaata o ceez o Joowo gɔl ci ka kurukti Lazaros buk, ¹¹eeci ɔl ci meel ole o Juz utuweec Yesu giye o itinjawi niini Lazaros daayiza.

Akunak Yesu Jerusalem

¹²Ma ŋeere iziiyit ɔl ci meel ole baal avunak loten o vardaŋinto e Yesu akunak Jerusalem. ¹³Uduulta ni niigi oto ci keen ween keteleen, ma avɔ arumek nɔɔnɔ gɔl ŋaati agernyi ane ne, “Atanaaz Jook. Amayuk Jooi eet o aku zaare o Manyi. Amayuk Jooi alaan o Israyil.”

¹⁴Anyaaktak ni ɔl Yesu jɔrɔn ci zigiro, ma atɔɔt kiyo ayeedi waragewi o Joowo azi ne, ¹⁵“ɔl o Jerusalem, má anyaku ŋoliin. Icinit di alaan unooŋ ŋaati akunakuŋ igeet joronte ci zigiro.”

¹⁶Maje waanice rak ɔɔwa e alaŋ nuyawa ogine kaal nicoko dook aga. Bar akɔ mazi itija Yesu ook tamma titinyonte onin e, aada nuyawa ayeedi kaala ci akati nɔɔnɔ noko waragewe o Joowo keelit tɔ laadun. Gi zin ci baal adiŋɔŋani ɔl nɔɔnɔ o neen.

¹⁷Ma ɔl baal arome kibeen Yesu iitene baal iŋaani niini Lazaros daayiza e, ɔɔt uduktak ɔl gi nico. ¹⁸Gi zin ci baal avɔ arumeke ɔl nɔɔnɔ gɔl o neen, eeci iziiyit niigi gi o adiŋɔŋ agɔɔn Yesu. ¹⁹Makacin izito ɔl o Parici ne, “Icinit di, ɔkomeyet. ɔkoma gi ci ka kutuguz. Oneec ɔl dook nɔɔnɔ.”

Aduwa Yesu zɔɔz ci akati daayiz onin

²⁰Maje buk waanice anyak ɔl ceen Garik ci avunak Jerusalem ka kivita kidiŋɔŋaniɔt Jook iitene o lotento. ²¹Ma avunak niigi Pilip o kutur o kazi Bezediya abil looce o kazi Galili. Ma avu anek nɔɔnɔ ne, “Manygɔn, karoŋɔnya di kicinta Yesu.”

²²Ma akɔ Pilip aduwak Andoru. ɔɔɔ ni Pilip ki Andoru uduktak Yesu zɔɔz nico.

²³Ma abedeke Yesu nɔɔgɔ anek ne, “Iiya zin iitene o ka kanyozokeke ŋeerti Eeto diŋɔŋani ci appe. ²⁴Didile kaduwakuŋ igeet, mā alaŋ kebereci ci labitoto aɔowe loota, ma adaai, abil kɔɔwe kizi nɔɔnɔ ele nɔkɔ. Bar mazi adaai, aduŋna, ma anyaa kebere ci meelik ger. ²⁵Ma zin eeti ci areez roget, iima akoloz. Maje bar eeti ci abor roget looce nico, ajowa ŋeere niini roget o abil been neen. ²⁶Ma eeti ci arɔɔŋ kiliŋliŋozeyan aneet, abon anowanan niini aneet ka ŋinti kaave naana, aave buk niini. Ma eet ci aliŋliŋonekan aneet, atitiny baaba buk nɔɔnɔ.

²⁷Inoko zin aneet awuci ziniz ɔɔɔt. Kayo zin kizi ne? Kizi ne, Baaba, rogozan piryakzete nico? Akom, eeci nici gi baal laadun kakune e neen. ²⁸Baaba, anyek zin zaar ugun diŋɔŋɔn.”

Iiya ni tamma mɔloyi ci azi ne, “Kanyeya zaar ogan diŋɔŋɔn, ma ŋaan kamena kanyi diŋɔŋɔn nɔkɔ.”

²⁹Maje ɔl ona eel ŋinaante e iziiyit molok nico, ma anɔ ne, “Ajul dim tammu?” Maje ogene anɔ ne, “Akom, azɔɔzɔ inoko toonnyaiti ci tammo ki nɔɔnɔ.”

³⁰Ma bar anek Yesu nɔɔgɔ ne, “Alaŋ mɔloyi nici aku giye can, bar aku giye cunooŋ. ³¹Inoko zin izi iiten ci ka kapawozeke looc gerzitin neen nici. Ka zin buk alaani o looc nico kɔɔɔye kook many. ³²Mazi ŋeere kɔɔɔŋe naana keete ween talakec, ŋaan kagura ɔl dook kivitayan aneet.” ³³Zin aduwa niini gi nico o ayelza keŋ ci daayiz onin ka kadaai.

³⁴Ma abedeke ɔl nɔɔnɔ anek ne, “Kagaya naaga azi waragewe o Joowo ne, Arogi katin Kiristo nɔkɔ been neen. Ma zin niina azi ne, Ka kɔɔɔŋe ŋeerti Eeto keete ween talakec o ku? Ma dim ceen ŋeerti Eeto o ŋeneen?”

³⁵Ma anek Yesu nɔɔgɔ ne, “ŋaan rak abil vooritin ŋaatumooŋ ŋintimiliny. Emeda zin rak ɔɔɔz gole nico nɔkɔ ŋinti ŋaan anyaku vooritin o, ka calaŋ akunakuŋ muuri. Eeci eeti ci awɔ muura alaŋ aga niini ŋinti akoyi o. ³⁶Ma ŋinti ŋaan rak anyaku vooritin o, utuweec vooritin nico ka iziti ɔl ci vooritino.”

Alaŋ ɔl o Juz atuwe

Mazi akɔ odotiz Yesu zooze nico, ɔɔɔ niini ŋaatineen iliitai nɔɔgɔ ele. ³⁷Mayo nuun waanice agɔɔn niini kaal ci meel ateeɔ ɔl biye nɔɔgɔ keberen e, ŋaan niigi kuteec nɔɔnɔ nɔkɔ. ³⁸Zin didi ibilun zɔɔz baal aduwa nyakaŋani o kazi Izaya e tɔ baal ane ne, “Manyi, ŋeneen dim ci ka kutu zɔɔz ci baal aduwaket noko? ŋeneen ci ka keyelizak Jooi ɔyiz onin?” ³⁹ŋaan zin didi waanice ɔl nica kutuyoi. Azi buk bodo Izaya ne, ⁴⁰“Atooz Jooi nɔɔgɔ kebere kizi rubene ka calaŋ acine. Ma buk abakbayen Jooi nɔɔgɔ zinzeeti ka calaŋ ageny. Agɔɔn niini nɔkɔ o ka calaŋ abadaak niigi nɔɔnɔ ka korogit.”

⁴¹Aduwa Izaya zɔɔz nico o, eeci baale icinun niini diŋɔŋɔn o Yesu, ma azɔɔz niini gi ci akati nɔɔnɔ.

⁴²Mayo nuun waanice utuweec alaata ci meel ole o Juz Yesu e, bar alaŋ arɔɔŋ niigi kɔɔɔta tuwen uneen kɔla, eeci aŋole niigi ɔl o Parici. Gerze ŋaan atɔɔk nɔɔgɔ ceeze uneen lotento. ⁴³Eeci areez niigi naatinet o ɔl o deer kujuk o Joowo.

Aduwa Yesu zɔɔz ci akati payiin

⁴⁴Ma agereny Yesu moloye ci appe azi ne, “Ma eeti ci atuyan aneet, alaŋ bar atuyan niini aneet doon, bar atu buk niini eet o itoonanan aneet. ⁴⁵Ma eeti ci acinan aneet, icin buk niini eet o itoonanan aneet. ⁴⁶Kakun zin naana ka kizi vooritin ci loocu, ka mā anyak eet ci atuyan aneet ka calaŋ bodo niini aavi muura. ⁴⁷Mā anyak eet ci azii zɔɔz can o, ma alaŋ atu, alaŋ naana kapaye nɔɔnɔ gerzitin. Eeci alaŋ kakun naana o ka kiiya kapayek looc gerzitin, bar ka korogoz. ⁴⁸Ma eeti ci abornan aneet, ma alaŋ agama zɔɔz can o, anyak eet ci ŋaan apayek nɔɔnɔ gerzitin tɔ. Ma zozowa ci kaduwa naana o ŋaan apayek katin nɔɔnɔ gerzitin iitene ci aŋorneke looci e. ⁴⁹Eeci akom gi ci kaduwa naana oowe can doon, bar baaba o itoonanan aneet neen o ilotekan gi o ka kuduwa. ⁵⁰Zin kaga naana zɔɔz o ilot niini anyaa roget o abil been neen. Ma gi ci kaduwa naana, kaduwa eo aduwakan baaba aneet.”

Oony Yesu nuyak ogin zɔɔ

13 ¹Mazi izi ŋinti ka kakatai iitene o loten o vardaŋinto, agawun Yesu iya iitene o ka kitinjawi niini loota ŋina kooyi ŋaati baatin tamma. Ma waanice gɔɔn areez niini nuyak ogin ɔɔɔt koŋorei. ²Mazi avu Yesu ki nuyak ogin ka kivita kadaktɔ baal, arayeke te Loryen Judaz ween ŋeerti Saiman Iskariat ziniz baabaninet ci ka kataalɔi Yesu. ³Maje waanice Yesu aga nɔkɔ baatine

areke kaal dook aziit onin. Ma aga aku niini Joowa, ma ka bodo kimiirozek Jook. ⁴ Itiŋa ni Yesu jena ŋaati dayiinto noko, ma aborca rum onin malkinto, ma adoma rum oma ci miliny pucpucaninto, ma acabek barkony. ⁵ Ma aɗuutek maam kodooc. Akata ni ŋaati oonyi nuyak ogin zɔɔ, ma ɛɛk bodo rume ci ona acabek barkony o. ⁶ Mazi akunak Yesu Saiman Pitɔr, ijin Pitɔr nɔɔnɔ enek ne, “Manyi, arooŋ dim toonyan niina aneet zɔɔ?”

⁷ Ma abedeke Yesu nɔɔnɔ anek ne, “Alaŋ inoko niina gi ci kagoon o aga, bar zin ŋaan aga tedec nuun.”

⁸ Ma anek Pitɔr Yesu ne, “Alaŋ agano ŋaati oonyan niina aneet zɔɔ been neen.”

Ma abedeke Yesu Pitɔr anek ne, “Mā alaŋ kuunyin naana ineet zɔɔ, alaŋ koca bodo niina een nuyai can been neen.”

⁹ Ma abedeke Saiman Pitɔr nɔɔnɔ anek ne, “Manyi, má oonyan zin zɔɔ doon, bar toonyan azeen kibeen ɔɔ buk.”

¹⁰ Ma anek Yesu nɔɔnɔ ne, “Ma ɛeti ci arane, itiliza nɔɔnɔ ɛle dook, ma alaŋ bodo arɔoŋ raninet, olla koca oony niini zɔɔ doon. Inoko zin buk niiga dook itilizawu, olla anyak ŋaatunooŋ eet codoi tɔr nɔkɔ ci ŋaan een ririny.” ¹¹ Aduwa Yesu gi nico o, eeci aga niini eet o ka kook kataalɔi nɔɔnɔ. Gi ci zin baal aduwan niini zɔɔz nico o neen.

¹² Mazi otoony Yesu nɔɔnɔ zɔɔ ugeec odota, aborcek bodo rum onin malkinto, ma abadaak tarabeza ŋin ona dayiinto e. Ma aku ajin niini nɔɔnɔ anek ne, “Inoko zɔɔz ci kagoonekuŋ naana igeet gi nico o agayu? ¹³ Gɔɔn niiga awuyaŋ aneet kizi eet ci demziinto, ma awuyaŋ buk kizi Manyi. Didi zin awuyaŋ juruŋ, eeci keen aneet neen. ¹⁴ Keen didi naana Manyi cunooŋ, ma keen eet cunooŋ demziinto. Kutuunyuy zin inoko naana igeet zɔɔ. Abon zin buk gɔɔn niiga oonyonu zɔɔ cugooc o maany. ¹⁵ Mazin kagoonekuŋ naana igeet gi nico o ka buk niiga utuguz nɔkɔ. ¹⁶ Didile kaduwakuŋ igeet, akɔm laadun gabaren ci adikir alaane cin. Ma buk akɔm eet ci itoonyai ci adikir eete o itoona nɔɔnɔ. ¹⁷ Inoko zin agawutu niiga gi nico. Mā avɔ agoonu nɔkɔ, amayukuŋ koca Jooi igeet.

¹⁸ Alaŋ zin kaduwakuŋ zɔɔz nico igeet dook, eeci kaga naana ɔl ogan kaŋera. Inoko zin ka keleeme zɔɔz o aduwa waragewi o Joowo azi ne, Ma ɛeti o kazola naana ki nɔɔnɔ dayiin ogan, otowe niinilya amaroyan aneet. ¹⁹ Kaduwakuŋ zin naana igeet gi nico inoko iŋaan kakatai o, ka tiŋeere ma akanai ka utuyaŋ naana aneet neen. ²⁰ Didile kaduwakuŋ igeet, ma ɛeti ci agama eet ci kitoon naana, agamanan buk niini aneet. Mazin ɛeti ci agamanan aneet o, agama buk niini eet o itoonanan aneet.”

Abɔra Yesu gerzitin o Judaz

²¹ Mazi adotiz Yesu zooze nico, uwucun nɔɔnɔ ziniz ɔrɔɔt, ma abɔrak nuyak ogin gi ci anek ne, “Didile kaduwakuŋ igeet, ataalinan tiŋeere ɛeti codoi ŋaatunooŋ.”

²² Ma agelemɔ nuyawa niigi maany, eeci abiir nɔɔnɔ ooti zooze nico, ma alaŋ aga eet ci ka kataalɔi nɔɔnɔ o. ²³ Maje nuyaiti o gɔɔn areez Yesu nɔɔnɔ aavi loota Yesu libira. ²⁴ Ma alakada Saiman Pitɔr nuyai nico, ma anek ne. “Jin di Yesu kuduwayin ŋeneen ci ariik niini o.”

²⁵ Icayak ni nuyaiti nici Yesu ijonun, ma ajin anek ne, “Manyi, ŋeneen dim ci arii o?”

²⁶ Ma abedeke Yesu nɔɔnɔ anek ne, “Eet neen o tedec kadoma ɗokoc, ma kacomeke wuci, ma kanyi nɔɔnɔ kadak.” Odoma ni niini ɗokoc ocomek wuci, ma anyek Judaz ween ŋeerti Saiman Iskariat. ²⁷ Mazi adoma Judaz ɗokoc nico, ook Loryen nɔɔnɔ ziniza enico ɛle. Ma anek Yesu nɔɔnɔ ne, “Tugu gi ci arooŋ tugu o taman.”

²⁸ Bar akɔm eet codoi nuyawe ci ona aavtiz aliya tarabeza o ci aga keŋ ci zɔɔz ci aduwak Yesu Judaz o. ²⁹ Ma zin bar giye o gɔɔn agami Judaz kaboon o guruco, abaabanit nuyawa ogene ŋaatineen izito ne, Coma arɔoŋ inoko Yesu nɔɔnɔ kook kataalayet dayiin ci iiten o lotento o, karabɔŋ bar arɔoŋ nɔɔnɔ kook kitirit ɔl o amaata.

³⁰ Mazi adoma Judaz ɗokoc, udun enico ɛle ook bitaala. Maje lɔɔci izi baalin.

Lotinet o colai

³¹ Mazi akɔ adun Judaz, enek Yesu nuyak ne, “Inoko zin eyelizai diŋdiŋɔni o ŋeerti Eeto. Ma buk eyelizai diŋdiŋɔni o Joowo ŋaatin. ³² Zin ma eyelizai diŋdiŋɔni o Joowo ŋaatin o, adiŋdiŋan buk tiŋeere Jooi nɔɔnɔ taman.

³³ Dɔl ogan, alaŋaan bodo karome naana ki igeet ŋinti reen. Arooŋnyaŋ zin tiŋeere, bar alaŋ ajowanay. Kiyo baale kaduwai alaata o Juz kanei ne, ŋinti kakɔye naana, alaŋ niiga animnyu ivita e. Kaduwakuŋ zin bodo buk inoko zɔɔz nico igeet. ³⁴ Inoko zin kanyuŋ lotinet ci colai ce. Ereeztɔ niiga dook. Kiyo gɔɔn kareezuŋ naana igeet o, ereeztɔ buk niiga dook nɔkɔ. ³⁵ Mā areezonu niiga dook nɔkɔ, agayuŋ koca ɔl dook igeet eeginu nuyak cigan.”

Aduwa Yesu danjin o Pitɔr

³⁶ Ma ajin Saiman Pitɔr Yesu anek ne, “Manyi, arooŋ dim bitɔ ŋaadaŋ?”

Ma abedeke Yesu nɔɔnɔ anek ne, “Ma ŋinti kakɔye naana o, alaŋ rak niina inoko anim nowawan, bar zin vurta ŋaan anowanan.”

³⁷ Ma ajin Pitɔr Yesu anek ne, “Manyi, naa akɔma alaŋ kanim kanuyin inoko o? Ma naana katoma kadaak ŋaatin labak.”

³⁸ Ma abedeke Yesu nɔɔnɔ anek ne, “Inoko dim didi niina anim daak ŋaatan? Didile kaduwakin ineet, adaŋnyan tija lak iiyu iŋaan toloci kɔrɔk.”

Yesu niini gɔl ci kavoyi ŋaati baatinai

14 ¹ Ma anek Yesu nɔɔnɔ ne, “Má anyeku zinzeeti kitiranyit, bar utuweec Jook. Utuyaŋ aneet buk. ² Ma ole o baaba anyak ceezi ci meelik ger. Inoko zin naana kakɔ ka kook kidimdiman ŋintunooŋ. Mate waan kizi gi ci azeeto, alaŋ waan kaduwakuŋ. ³ Mazi kook kidimdimana ŋintunooŋ o odota, ŋaan kabada bodo ka kiiya kooyuŋ igeet, ka ŋinti kaave naana o, aavtiyu niiga buk. ⁴ Agayu ri niiga gɔl ci akɔ ŋaati kakoyi naana o nɔkɔ.”

⁵ Ma anek Tomaz nɔɔnɔ ne, “Manyi, alaŋ naaga ŋinti akoye niina o kagaya. Kagaya yo gɔl ci akoye niina o ku?”

⁶ Ma abedeke Yesu Tomaz anek ne, “Aneeta neen o keen gɔl, ma keen didi, ma keen roget. Akɔm eet ci akunak baaba calaŋ aduŋna niini ŋaaten aneet. ⁷ Inoko zin mā agawutaŋu niiga aneet o, ŋaan agayu baaba buk. Bar zin buk inoko agawutu nɔɔnɔ, ma icintu.”

⁸ Ma anek Pilip nɔɔnɔ ne, “Manyi, yeleyet da baatun, olla gi ci karoŋnya dook neen.”

⁹ Ma abedeke Yesu nɔɔnɔ anek ne, “Pilip, koromte naana ki igeet ŋinti wun kal. Maŋaan niina gawan nɔkɔ? Ma zin azi ne, Yeleyet baatun o, naa? Ma ɛeti ci icinan aneet, icinun buk niini baaba. ¹⁰ Pilip, alaŋ aga niina kaave naana ŋaati baaba, ma aavi buk baaba ŋaatan o? Ma zozowa ci kaduwakuŋ igeet o, alaŋ kaduwa naana oowe can doon, bar zin baaba o aavi ŋaatan neen o agɔɔn liŋliŋɔn onin maany. ¹¹ Abon zin atuyaŋ niiga aneet zooze o kanekuŋ ne, Aavi baaba ŋaatan, ma buk kaave ŋaatin. Mā alaŋ

atuyan niiga aneet zooze nico, utuyan kaale o kagoon. ¹² Didile kaduwakuj igeet, ma eeti ci atuyan aneet agoon buk niini kaal o kagoon naana ele. Ma bar buk agoon niini kaal ci adikir woot kujuk nicoko, eeci inoko kako naana nyaati baaba. ¹³ Zin olla ma anyak gi ci ajinu niiga zaare ogan, nyaan kagoonekuj naana igeet ka diñdiñoni o baaba keyelzyai nyaaten neerin. ¹⁴ Ma anyak gi ci ajinañ niiga aneet zaare ogan, kagoonekuj.

Aduwa Yesu kuni o Vojiz o Joowo

¹⁵ Ma areezanj niiga aneet, uzuuti lotinok ogan. ¹⁶ Nyaan kajin naana baaba ka kanyuj igeet tiritoi oma ween Vojiz o Joowo ka oromte ki igeet noko been neen. Niini Vojiz ween didi o ayelza leemi o Joowo. ¹⁷ Alañ ol o loocu agama noono, eeci alañ niigi acin noono, ma alañ aga. Bar zin niiga agayu noono, eeci aavi niini nyaatunooñ, ma aromenu ki igeet.

¹⁸ Alañ kooñnekuj igeet looc aavtiz doon, bar nyaan kabadakuj. ¹⁹ Njintimiliny alañ bodo ol ci loocu noko acinan aneet, maje niiga nyaan acinañ, eeci naana karogi, ma nyaan buk tiñeere niiga arognu. ²⁰ Tiñeere iitene nice nyaan agayu kaave naana nyaati baaba, maje niiga aavtiyu nyaatan, kiyo buk kaave naana nyaatunooñ o. ²¹ Ma eeti ci agama lotinok ogan, ma azooni, eet o areezan aneet neen. Ma eet ci areezan aneet, areez buk baaba noono. Ma kareez buk naana noono, ma kayelzai noono ele can o.”

²² Ma azi Judaz oman calañ een Judaz Iskariat ne, “Manyi, ka yeleyet ele cun o ageeta doon, ma alañ ayelzai ol ci looc o ku?”

²³ Ma abedeke Yesu noono anek ne, “Ma areezan eeti aneet, azooni niini zoz onan. Ma areez buk baaba noono. Ma kavunaka naana ki baaba noono, ma kabaaka ki noono nyaatodoi. ²⁴ Maje eeti calañ areezan aneet, alañ azooni niini zoz onan. Ma zin bar zoz ci aziñnu niiga kaduwa o, alañ een zoz can, bar zoz ci baaba o itoonanan aneet.

²⁵ Kaduwakuj zin zozok nicoko ñinti nyaan karomen naana kibeen igeet o. ²⁶ Ma zin tiritoiiti ween Vojiz o Joowo o ka kitoona baaba zaare ogan nyaan aku ademzekuj tiñeere niini ageet kaal dook, ma buk nyaan aadakuj kaal o goon kaduwakuj naana igeet dook.

²⁷ Inoko zin kadotekuj igeet ganon onan. Ma ganoni cane kanyuj igeet o, alañ atobo ki ganon o loocu. Ma anyeku zin zinzeeti kitiranyit. Ma anyaku ñoliin. ²⁸ Iziiktu rak uyene keneyuj ne, Kawo naana, ma bodo kako kabadakuj. Inoko zin ma areezanj didi niiga aneet, abon atalninu giye ci kakoyi naana nyaati baaba o, eeci niini adikir nyaatan. ²⁹ Kuduwayuj zin kaal nicoko inoko iñaan kakatai o, ka ma tiñeere akanai ka utuyan niiga aneet. ³⁰ Alañ zin bodo kazozo naana kibeen igeet ñinti wun, eeci alaan o loocu neen ci aku noko. Bar zin akom niini gi ci ka kodoma nyaatan. ³¹ Abon zin aga looci reezi o kareeze naana baaba. Ma kagoon kaal dook eo ilotekan niini aneet.

Inoko zin itingaz kotoz njina.”

Yesu niini atobo ki keet dikiron

15 ¹ Ma anek Yesu nuyak bodo ne, “Keen naana keet dikiron. Maje baaba niini eet o keetu neen. ² Ma anyak otom calañ abiir nyaatan, ajeedak niini tuu. Maje otom o goon abiir, azeec kitiliza ka kibiir juruj. ³ Inoko zin niiga itilizawu giye o zoz baal kaduwakuj e. ⁴ Oromtezeyanj zin niiga aneet, maje buk naana karomonekuj igeet. Akom goon laadun otom ci abiir alye cin doon calañ akanonek keet dikiron. Ma alañ aromonekanj niiga aneet, eelnu buk koca niiga noko.

⁵ Keen zin naana keet dikiron, maje niiga eeginu oto. Ma eeti ci aromonekan aneet, maje buk naana karomonei noono, eet o abiir juruj neen. Eeci ma kadeyai naana nyaatunooñ, akom niiga doon gi ci ka utuguz. ⁶ Ma anyak eet calañ aromonekan aneet, ateedjak koca niini looc kiyo keet otom o, ma araabjai, ma alote ka kakatozek goo. ⁷ Ma oromtozeyanj niiga aneet, ma aavu zoz onane nyaatunooñ, olla ma anyak gi ci aroonyu, ma ajinu Jook, ajowanu. ⁸ Ma abiirnu juruj, anyak gi nici baaba diñdiñon. Ma izitu koca didi niiga nuyak cigan. ⁹ Ma naana kareezuj igeet kiyo areezan buk baaba aneet o. Uruktek zin zoz looc reezinte can o. ¹⁰ Ma azuunu lotinok cigan o, urukteyu koca zoz looc reezinte onan didi kiyo kazoone naana lotinok o baaba, ma buk karuwei zoz looc reezinte onin o.

¹¹ Kaduwakuj zin naana zoz nico o ka talniin onane kaavu nyaatunooñ, ka zin talniin unooñ kidikir. ¹² Zoz zin can kilotekuj ce. Ereeto niiga dook kiyo buk kareezuj naana igeet o. ¹³ Akom bodo reezinet ci adikir kujuk ci adaakni eeti nyaati lañotigin.

¹⁴ Zin ma agoonu niiga kaal ci kilotekuj naana igeet o, izitu koca niiga lañotigan didi. ¹⁵ Inoko zin alañaan naana kawuyuj bodo igeet iziti gabara, eeci goon gabarenti alañ aga gi ci agoon alaani onine. Bar zin inoko naana kutuwuj igeet iziti lañotigan, eeci kuduwayuj igeet kaal o kaziikna nyaati baaba dook. ¹⁶ Alañ añerananj niiga aneet, bar aneet neen o kañeranj igeet ka zoto ibiirta kebere ci eel kodot. Ka zin kanyuj baaba igeet gi ci olla ajinu niiga noono zaare ogan. ¹⁷ Inoko zin kilotekuj gi ci kanekuj ne, Ereeto niiga dook.”

Amarnin looci ol o atuwe

¹⁸ Ma anek Yesu nuyak bodo ne, “Ma amarninuj looci igeet, agaac amaroyan rak baale zowa aneet. ¹⁹ Mate waan iziti ol ci looc nico, areezuj waan niini igeet, eeci eeginu ol cigin. Bar zin keñerawuj naana igeet looce nico. Alañaan zin bodo eeginu ol cigin. Gi ci zin amarninuj looci igeet o neen. ²⁰ Aada zoz baal rak kaduwakuj kanekuj ne, Akom gabaren ci adikir alaane cin e. Zin kiyo amarninan ol aneet o, buk tiñeere amarninuj niigi igeet noko. Ma da kuzuuti niigi zoz can o, azooni waan buk koca niigi tiñeere zoz cunooñ. ²¹ Agoonekuj zin niigi igeet kaal ci ger noko dook giye can, eeci alañ aga niigi eet o itoonanan aneet. ²² Ma da iñaan kiiya kuduwak naana noozo zoz o Joowo, alañ waan niigi aga anyak oñe o. Bar zin inoko o okoma gol ci ka kadañti niigi oñe ugeec. ²³ Ma eeti ci abornan aneet, abor buk niini baaba. ²⁴ Inoko da iñaan kutugu kaal o atet ol biye o nyaan laadun eeti codoi nyaatineeñ kutugu, alañ waan niigi aga anyak oñe o. Bar zin inoko icinit niigi kaal o kagoon, ma enico dook amartoyanj niigi aneet, ma amarnin buk baaba. ²⁵ Zin agooni kaala nici o ka keleeme zoz baal ayeedi waragewe o Joowo azi ne, Amarninan niigi aneeta gaga noko giye ci akom keñ e.

²⁶ Zin tiñeere ma koowa naana nyaati baaba, nyaan kako kitoonakuj igeet tiritoi ween Vojiz o Joowo. Ma niini Vojiz o aku nyaati baaba neen. Ma ayelzak niini ol zoz ween didi akanan aneet. ²⁷ Zin buk niiga nyaan eeginu bacok cigan, eeci koromte naana kibeen igeet ñinbaal kakune e dook.”

16 ¹ Ma anek Yesu bodo noozo ne, “Kaduwakuj zin zoz nico o, ka ma akunakuj igeet piryakzet calañ oonnu tuwen unooñ. ² Atookuj tiñeere ol igeet ceezine o lotento. Ma buk aku tiñeere iiteni ci arukuj ol igeet adaayit, ma bar abaaban niigi kizik alinñonek niigi Jook juruj giye ci arukuj igeet o. ³ Agoonekuj niigi kaal nicoko o, eeci alañ aga baaba, ma alañ agayan buk niigi aneet. ⁴ Zin kaduwakuj naana igeet kaal nicoko o, ka ma aku iiteni nica ka aada kuduwayuj baale naana igeet kaal nicoko laadun.

Liŋliŋon o Vɔŋiz o Joowo

Ŋaan laadun rak baale kuduwayuŋ igeet kaal nicoko o, eeci karome naana kibeen igeet. ⁵ Bar zin inoko ka kook naana ŋaati baaba o itoonanan aneet. Akom zin ŋaatunooŋ eet ci ka kijinan kizi ne, Akɔ dim ŋaa? ⁶ Inoko zin atiranyuŋ igeet zinzeeti o, eeci kanekuŋ ne, Kawɔ naana. ⁷ Didile kaduwakuŋ igeet, abon kawɔ naana ŋaatunooŋ, eeci mǎ alaŋ kawɔ, alaŋ koca akunakuŋ tiritoitii ween Vɔŋiz o Joowo. Bar zin mǎ kɔtɔwa, ŋaan kitoonakuŋ nɔɔnɔ kiiyayuŋ igeet. ⁸ Zin tiŋeere mǎ aku niini, ŋaan aku ayelek ɔl o loocu gi o otoozi niigi gerze baciinowe ugeecik. Ma aku ayelek buk niini nɔɔɔ kaal ugeec ger abaaban niigi bar kizik abon. Ka buk kiiya keyelek niini nɔɔɔ gi o alaŋ agawi niigi payiin o Joowo ka kiiya. ⁹ Zin tiŋeere aku ayelzak Vɔŋiz o Joowo nɔɔɔ baciinok o, eeci alaŋ atuyan niigi aneet. ¹⁰ Ayelzak buk tiŋeere niini nɔɔɔ bonat onan giye o kakɔye naana ŋaati baaba, ma alaŋ bodo acinaŋ niiga aneet been neen. ¹¹ Ayelzak buk tiŋeere niini nɔɔɔ gi o alaŋ agawi niigi payiin o Joowo, eeci alaan o abal looc nico apawozek nɔɔnɔ gerzitin laadun.

¹² Kanyei zoosok ci meel karooŋ kuduwayuŋ, bar zin alaŋ rak niiga inoko o animnyu uzuuti zoosok nicoko. ¹³ Zin tiŋeere ma iya Vɔŋizi o Joowo een didi, ŋaan aku ayelekuŋ niini igeet kaal nicoko dook. Alaŋ zin bar niini tiŋeere aku azɔɔz alaazete cin doon, bar aduwa tiŋeere niini kaal o aziikna ŋaati baaba, ma buk aku aduwakuŋ niini igeet kaal o ka kakatai dook.

¹⁴ Anyan niini aneet zany, eeci tiŋeere adoma zɔɔz onan, ma aduwakuŋ igeet. ¹⁵ Ma kaal o baaba dook kaal cigan. Gi zin ci kanekuŋ ne, Ŋaan adoma Vɔŋizi o Joowo kaal o kaduwai naana nɔɔnɔ, ma aku aduwakuŋ igeet o neen.”

Ookci culum kizi talniin

¹⁶ Ma anek Yesu nuyak ne, “Inoko zin ŋintimiliny alaŋ acinaŋ rak niiga aneet, ma bodo ŋintimiliny ŋaan acinaŋ.”

¹⁷ Ma anɔ nuyawa ogine maany ne, “Ma dim azi ne, ŋintimiliny alaŋ rak acinaŋ, ŋintimiliny ŋaan acinaŋ bodo o naa? Bodo buk azi ne, Kako ŋaati baaba. Mayo zɔɔz nico keŋ cine akati naa? ¹⁸ Gitaz ci ane ne, ŋintimiliny, o? Alaŋ zin naaga kaga keŋ ci aduwak niini zɔɔz nico o.”

¹⁹ Maje Yesu aga nɔkɔ arɔɔŋ kijinit nɔɔnɔ kaal nicoko o. Enek ni niini nɔɔɔ ne, “Ma dim gi ci ajinonu o gi ona kanɛ ne, ŋintimiliny alaŋ rak acinaŋ, bodo ŋintimiliny ŋaan acinaŋ e neen? ²⁰ Didile kaduwakuŋ igeet, tiŋeere niiga aluyu, maje bar looci atalne. Tiŋeere akanu culum, zin bar culum cunooŋ o ŋaan ookci kizi talniin. ²¹ Gɔɔn ŋaa mǎ ka kotoyai, aam dole, ma abalac ɔɔɔt. Bar mazi akɔ ookcai, areyek bodo nɔɔnɔ piryakzet we, ma atalne labak, eeci otoyai. ²² Atobɔ zin buk gi nici kibeen igeet ci akanu culum inoko o. Ŋaan zin bodo kako kabadakuŋ, ma iitene nice atalninu niiga ɔɔɔt. Ma talniin nice akom eet oma ci ka kaamawuŋ igeet. ²³ Ma iitene nice agayu niiga kaal dook, ma alaŋ bodo ajinaŋ aneet. Didile kaduwakuŋ igeet, mǎ alam gi ci ajinu baaba zaare ogan, anyononekuŋ. ²⁴ Zin laadun ŋaan akom gi ci ajinu niiga baaba zaare ogan zee been inoko o. Abon zin ajinu ka kanyozoyuŋ, ka talniin unooŋ kizi appe.

Amok Yesu looc

²⁵ Inoko gɔɔn kaduwakuŋ igeet kaal nicoko dook yabziinta. Bar zin tiŋeere aku iitene calaŋ bodo kaduwakuŋ igeet kaal yabziinta, bar enice kabɔrakuŋ naana igeet zɔɔz o akati baaba kiziiye labak. ²⁶ Ma iitene nice ŋaan ajinu niiga baaba zaare ogan. Alaŋ kanekuŋ ne, Ka bodo kijineyuŋ baaba naana. ²⁷ Eeci baaba areezuŋ igeet giye o buk niiga areezaŋ aneet, ma utuyaŋ kakun naana ŋaatin. ²⁸ Kakun baale laadun naana ŋaati baaba. Kakunai looc. Bodo zin inoko ka kotoŋ looc kimiire kook ŋaati Baaba.”

²⁹ Ma anek nuyawa ogine nɔɔnɔ ne, “Inoko zin ɔbɔra zoosok calaŋ aduwa yabziinta. ³⁰ Inoko zin didi kagayin aga niina kaal dook. Akom zin bodo eet ci ka kijinin ineet gi ci ajinin. Mazin giye nico kutuyin naana iya da didi niina Joowa.”

³¹ Ma abedeke Yesu nɔɔɔ anek ne, “Inoko utuyowu? ³² Ŋaan zin aku iitene, ma bar buk inoko o ibilun tɔ laadun, azaanoneku tiŋeere niiga dook korogjok ugooc, ma adotekaŋ looc aneet doon. Alaŋ zin bar kaave naana doon, eeci karomena kibeen baaba. ³³ Kaduwakuŋ naana igeet zɔɔz nico o, ka anyayit ganon ŋaati aromonekaŋ niiga aneet. Agiduŋ tiŋeere looci igeet. Bar zin odoyit, eeci agayu kɔmɔga naana looc.”

Aŋaryonek Yesu nuyak ogin

17 ¹ Mazi adotiz Yesu zooze nico, adɔŋ kebere ki tammu taden, ma azi ne, “Baaba, inoko zin iya iitene. Anyek zin ŋeerun diŋdiŋon ka buk kanyin niini ineet diŋdiŋon. ² Eeci anyan niina aneet alaazet ci ka kabali ɔl dook, ka kanyek naana roget o abil been neen ɔl baal anyan niina aneet e. ³ Zin roget o abil kodot neen gi o ka kagayin ɔl dook ineet doon een niina Jook ween didi, ma buk agayan niigi aneet keen naana Kiristo baal itoonanan niina. ⁴ Ma zin naana keyeliza diŋdiŋon unun loota giye o kidicaye liŋliŋon baal anyan aneet kutugu e. ⁵ Baaba, inoko zin nyan diŋdiŋon o abil ŋume unun kiyo baale gɔɔn anyan laadun iŋaan keteenyai looci e.

⁶ Inoko zin keyelizawin ineet ole baal aŋera, ma anyan aneet loota ŋina e. Niigi laadun ɔl cugun, ma anyan niina aneet. Uzuuti zin niigi zɔɔz unun. ⁷ Ma inoko agaac niigi kaal o anyan niina aneet dook kaal ugun. ⁸ Kuduwaya zin naana nɔɔɔ zɔɔz baal anyan e. Agamta zin, makacin agaac niigi didi kakun naana ŋaatun, ma utuyo itoonanan didi aneet niina.

⁹ Kaŋaryonei zin naana nɔɔɔ. Alaŋ bar kaŋaryonei looc, bar kaŋaryonei nɔɔɔ baal anyan niina aneet e, eeci een niigi ɔl cugun. ¹⁰ Ma kaala ogane dook kaal cugun. Maje buk kaala ugune dook kaal cigan. Eyelizai zin diŋdiŋoni onane ŋaatineeŋ. ¹¹ Inoko zin naana kakunakin ineet. Alaŋan bodo kaave loota, bar aavtiyo loota niigi doon. Baaba onan adiŋdiŋ, zooti zin niina nɔɔɔ ci baal anyan aneet o juruŋ dɔyize o zaar ugun ka buk niigi kodoye kiyo kadoye naana kibeen ineet o. ¹² Ma ŋinbaal ŋaan karomena naana ki nɔɔɔ e, kozoote nɔɔɔ ci baal anyan aneet o juruŋ zaare ugun. Kozoote nɔɔɔ dook, ma akom codoi ŋaatineeŋ ci akoloni, bar akoloni eeti baal laadun aduyai waragewa e doon ka keleeme zɔɔz unune. ¹³ Inoko zin naana kakunakin ineet. Ma zin kaal nicoko kaduwa loota ŋina o ka kanyayit niigi talniin onan zinzeetine ugeec kizi appe. ¹⁴ Kanyeia naana nɔɔɔ zɔɔz unun. Ma amaraɔ looci nɔɔɔ, eeci alaŋ niigi een ɔl ci loocu, kiyo buk naana alaŋ keen eet ci loocu o. ¹⁵ Alaŋ zin bar kajinin ineet ka aara nɔɔɔ loota ŋina, bar kajinin o ka bek nɔɔɔ juruŋ Loryenta. ¹⁶ Kiyo naana alaŋ keen eet ci loocu o, buk niigi alaŋ eegin ɔl ci loocu. ¹⁷ Anyek nɔɔɔ kizi ɔl cugun zooze unun een didi. ¹⁸ Kitooneya zin buk naana nɔɔɔ loocok kiyo buk itoonanan niina aneet kiiyak looc o. ¹⁹ Kanyin zin naana ele can o ineet ka korogoz nɔɔɔ, ka kiziti niigi ɔl cugun zooze unun een didi.

²⁰ Alaŋ zin kaŋaryonei nuyak nicoko doon, bar buk kaŋaryonei ɔl o tiŋeere avu agama zɔɔz onan ŋaatineeŋ. ²¹ Baaba, anyek nɔɔɔ dook kodoye, kiyo kadoye buk naana kibeen ineet o. Ka kagaac ɔl o loocu didi itoonanan niina aneet. ²² Kanyeia naana

nɔɔɔ diɲɲɔn ci atobo kibeen o anyan niina aneet, ka zin buk niigi kodoye kiyoo kadoye naana kibeen ineet o. ²³ Kaave naana ɲaatineɲ kiyoo buk aave niina ɲaatan o. Ka zin kodoye niigi kiyoo buk kadoye naaga o, ka kagaac ɔl o loocu itoonanan niina, ma areez niina nɔɔɔ kiyoo buk areezan aneet o.

²⁴ Baaba, ineet neen o anyan aneet ɔl nicoko. Karooɲ zin nɔɔɔ ka koromtewa ki aneet ɲaao kaave naana ka kicinit niigi diɲɲɔn onan baal anyan e, eeci laadun areezan niina aneet ɲaagan looci keteenyai e.

²⁵ Baaba, ineet neen o agoon kaal dook kobonta. Ma bar alaɲ ɔl o loocu agayin ineet. Bar kagayin naana doon. Ma agaac buk ɔl nicigi itoonanan didi niina. ²⁶ Inoko zin keyelizaya zaar ugun nɔɔɔ, ma ɲaan kamena kagoon nɔkɔ, ka buk reezinet o areezan niina aneet kibil ɲaatineɲ, ma buk naana kaave ɲaatineɲ.”

Gamiin o Yesu

18 ¹ Mazi ako odotiz Yesu ɲaryiinta, itingazo niini kibeen nuyak ogin ɔtɔɔɔ, ma avɔ abaayiz nyarat o kazi Kidiron. Anyak ɲinaante mana, ma avɔ Yesu kibeen nuyak ogin mane nico eecitɔ. ² Maje Judaz baal ka kiiya kataalɔi Yesu e aga ɲinite, eeci goon waanice Yesu kibeen nuyak alote ɲinaante. ³ Ook ni Judaz ɲinaante ɔrkɔr ki takirnya kibeen ɔl o goon abek ceez o Joowo. Itoona nɔɔɔ ɔl o Parici kibeen alaat o ceez o Joowo. Anyak niigi azeenen tɔlit kibeen dilanya. ⁴ Maje Yesu aga kaal ci ka kivita kutuguzozek nɔɔnɔ o nɔkɔ. Mazi avu arum niigi mana, iiyak Yesu nɔɔɔ, ma anek ne, “Arooɲnyu dim ɲeneen?”

⁵ Ma abedeke niigi nɔɔnɔ anek ne, “Karooɲnya Yesu o Nazaret.”

Enek ni niini nɔɔɔ ne, “Aneeta ele neen nici.”

Maje Judaz o ka kataalɔi Yesu e, arome kibeen nɔɔɔ. ⁶ Mazi anek Yesu ne, “Aneeta ele neen nici,” amiiri niigi kivurut, ma aruk looc.

⁷ Bodo ni ajin Yesu nɔɔɔ anek ne, “Arooɲnyu dim ɲeneen?”

Ma abedeke niigi nɔɔnɔ anek ne, “Yesu o Nazaret.”

⁸ Ma anek Yesu nɔɔɔ ne, “Ma uyen kanekuɲ ne, Aneeta neen nici. Mate arooɲnyar aneet, anycek rak nuyak ci karomena o kɔtɔɔɔ.” ⁹ Aduwa niini gi nico o ka keleem giye baal ane ne, “Baaba, akom eet ci kakuluz ole baal anyan e.”

¹⁰ Maje Saiman Pitɔr anyak kabaz ci wun, ma avoca tibila, ma aruk gabaren ci alaan o ceez o Joowo keteeda itat ci azo o vɔc. Kazi zaar ci gabaren nico o ne Malkos. ¹¹ Ma anek Yesu Pitɔr ne, “Bil. Yizek kabaz cun noko tibil. Abaaban niina kizik bar ɲaatun kaɲole naana piryakzet ci baal laadun anyan baaba ka kipirai o?”

Anyaaɔ ɔl Yesu Anas

¹² Enico odomta takirnya kibeen alaan uneɲ kibeen ɔl o goon abek ceez o Joowo agamit Yesu, ma acap azeen. ¹³ Ma avɔyi rak ɔɔwa alaane o kazi Anas ween baati dole o ariyi Kayavas. Maje Kayavas alaan ci ceez o Joowo irkite nice. ¹⁴ Ma zin Kayavas eet baal ilot alaat o Juz anek ne, “Abon adaai eeti codoi ole o Juz ka kirigizit ɔl o Juz dook roget,” e neen.

Adaɲ Pitɔr Yesu

¹⁵ Oneec ni Saiman Pitɔr kibeen nuyai oma Yesu. Mazi avɔyi ɔl Yesu korge ci alaano o, ook buk nuyaiti ɔl nici eecitɔ, eeci eeti ci korgu o aga nuyai nico.

¹⁶ Maje Pitɔr abil bitaala ajɔɲɔz araan. Ma amiironnek nuyaiti ona ako kɔrga eecitɔ e araan tatok, ma ako aduwak dole o abek araan kɔkɔla Pitɔr kiiyak kɔrɔk keɲ. ¹⁷ Ma ajin dole nici Pitɔr anek ne, “Alaɲ buk niina een nuyai ci eet nico?”

Bar abedeke Pitɔr nɔɔnɔ anek ne, “Akɔm, alaɲ keen nuyai cin.”

¹⁸ Maje baaline nice alal laju ɔrɔt. Ma adoma gabara ki ɔl o abeke avaat goo ci aavtiye zɔlɔmɔi. Ma aku aromonek buk Pitɔr nɔɔɔ, ma abilnek goo.

Ajin Anas Yesu

¹⁹ Ma ɲinaanto ijinun Anas Yesu kaal ci akati nuyak ogin kibeen demziin onin. ²⁰ Ma anek Yesu nɔɔnɔ ne, “Kabora goon naana zɔɔɔ ɔl dook kebereca labak, ma kademez goon ɔl tup ceezine o lotento kibeen ceeze o Joowo goon aloten ɔl o Juz. Akom laadun naana gi ci kaɲomoti been neen. ²¹ Mazin yo ajinan aneet? Bar jin ɔl o goon aziɲɲan aneet ɲaati kazɔɔze kaal o kaduwai nɔɔɔ, eeci aga niigi kaal ogan kaduwa.”

²² Mazi aduwa Yesu zɔɔɔ nico, apanun eeti codoi ole ci ona abek nɔɔnɔ o voret, ma anek ne, “Aduwai alaan ci ceez ci Joowo adikir o gi nico?”

²³ Ma abedeke Yesu nɔɔnɔ anek ne, “Mā anyak gi ci kabaci, duwak ɔl dook ɲina kiziiyit gi ci kabaci o. Mazi akom gi ci ger kaduwa, arukan zin naa?” ²⁴ Enico itonek Anas Yesu Kayavas ween alaan o ceez o Joowo, maje azeena ɲaan acabje nɔkɔ.

Adaɲ Pitɔr Yesu bodo

²⁵ Mazi ɲaan abilnek Pitɔr goo nɔkɔ, ijinit bodo ɔl ogene nɔɔnɔ enektek ne, “Alaɲ een buk niina nuyai ci eet nico?”

Bar adaɲnyi Pitɔr azi ne, “Akɔm! Alaɲ keen naana nuyai cin.”

²⁶ Maje ɲinaante buk anyak gabaren ci alaan o ceez o Joowo ceen goɲni eet ona ateeda Pitɔr nɔɔnɔ itat e. Ma ajin niini Pitɔr anek ne, “Alaɲ een ineet neen o kacinuɲ ki nɔɔnɔ mana e?”

²⁷ Bodo ni adaɲnyi Pitɔr azi ne, “Akɔm, alaɲ een aneet.” Enico orowun toloci.

Anyaaɔ ɔl Yesu Pailat

²⁸ Ma ɲeere ririwɔna uduntai ɔl Yesu ceeze o Kayavas, iiya itoontek niigi nɔɔnɔ alaan o Jerusalem een Romen kazi Pailat. Ivita ni alaata o Juz, ma avu eel kɔrɔk keɲa, eeci alaɲ arɔɲɔ niigi kanyaaktak eleeti ririny gerze ɲaan alam nɔɔɔ ɲaati avɔ adayi dayiin o aadane iiten o vardarjinto. ²⁹ Ma akunak Pailat nɔɔɔ bitaala, ma aku anek ne, “Ma dim eet nico anyaaɲ o agoon naa?”

³⁰ Ma abedeke niigi nɔɔnɔ anek ne, “Mate waan kɔkɔma gi ci ger agoon, alaɲ waan kanyaakin ineet.”

³¹ Ma anek Pailat nɔɔɔ ne, “Ooti zin nɔɔnɔ ka ɔt apayit niiga alya lotinowe o keerane ugooc.”

Ma abedeke niigi nɔɔnɔ anek ne, “Alaɲ goon naaga kaganona ɲaati karuka ɔl kadaayitɔ.” ³² Ma gi nici akanai o ka keleeme zɔɔɔ baal aduwa Yesu akati daayiz onin ka kadaai keete ween talakec e.

³³ Imiurozek Pailat ceez, ma awa Yesu, ma aku ajin anek ne, “Ineet alaan o Juz neen?”

³⁴ Ma abedeke Yesu nɔɔnɔ anek ne, “Ma dim gi nico ajinan niinalya, yo anyak da eet ci aduwakin kaal ci akanan aneet?”

³⁵ Ma abedeke Pailat nɔɔnɔ anek ne, “Alaŋ keen naana eet ci Juz. Ɔl ugun maany kibeem alaata o ceez o Joowo neen ci anyaanin ineet ŋina o. Ma laadun abaca naa?”

³⁶ Ma abedeke Yesu nɔɔnɔ anek ne, “Alaŋ baliin cane abil loota ŋina. Mate kibil ŋina, alaminan waan nuyawa ogane calaŋ agamnyan alaata ci Juz o. Bar zin inoko o alaŋ baliin cane abil ŋina.”

³⁷ Ma ajin Pailat bodo Yesu anek ne, “Een zin boŋ alaan ci adikir?”

Ma abedeke Yesu nɔɔnɔ anek ne, “Didi zin. Abil kiyo aduwa niina o. Keen naana alaan. Karitai laadun, ma kakunai looc nico o ka kuuwak zɔɔz ween didi. Ma zin eeti ci agama zɔɔz ween didi azii niini zɔɔz onan.”

³⁸ Ma ajin Pailat nɔɔnɔ anek ne, “Ma zɔɔz ceen didi o neen gitaz?”

Apawozek Yesu daayizi

Enico udun Pailat ook ole o Juz e bitaala, ma ako anek nɔɔgɔ ne, “Akɔm naana gi ci ger kajowa eete nico ka kapayeke nɔɔnɔ daayiz. ³⁹ Ma zin keere unooŋ ɔl o Juz gɔɔn laadun kaborcakuŋ iheet eet codoi ole o acabje iitene o loten o vardaŋinto. Mayo zin inoko arooŋnyu koborocayuŋ alaan cunooŋ adikir o?”

⁴⁰ Bar agereny niigi dook anɔ ne, “Akɔm! Má aborca nɔɔnɔ! Bar borocayet Barabas.” Maje Barabas nici waanice niini agoryai ci acabje zooze ci aami ɔl kaal.

19 ¹ Anyek ni Pailat Yesu takirnya korooyit nɔɔnɔ. ² Ma agɔɔna takirnya nyagirgir ceen bila, ma aborceke nɔɔnɔ ɔɔ, ma bodo aborceke rum ci meeri ele. ³ Ma avunak nɔɔnɔ, ma amomoz anek ne, “Rogo bai kodot alaan o Juz adikir.” Maje bodo ŋaato apan voret azeenen.

⁴ Ma amiironek bodo Pailat ɔl dook bitaala, ma ako anek ne, “Iziyyit di, ŋaan kanyaakuŋ Yesu ka agaac akɔm naana gi ci ger kajowa ŋaatin ka kapayeke nɔɔnɔ daayiz.” ⁵ Uduna ni Yesu bitaalin. Maje ɔɔwa anyak nyagirgir ceen bila noko, ma anyak rum ci meeri noko alya. Ma aku anek Pailat ɔl ne, “Icinit di, eet neen nici.”

⁶ Mazi acin alaata o ceez o Joowo kibeem bekcok o ceez o Joowo Yesu, egerenyit izito ne, “Otodeec nɔɔnɔ! Otodeec nɔɔnɔ keete ween talakec?”

Ma anek Pailat nɔɔgɔ ne, “Ooti ka ɔɔt otodeec nɔɔnɔ niiga alya, eeci akɔm naana gi ci ger kajowa ŋaatin ka kapayeke nɔɔnɔ daayiz.”

⁷ Ma abedeke ɔl o Juz Pailat anek ne, “Kanyaka naaga lotinok cigaacak. Mazin lotinowe ogaacak agano niini ki daayiz, eeci anyek ele kizi ŋeerti Joowo.”

⁸ Mazi azii Pailat zɔɔz nico, anyawun niini ŋoliin ɔɔɔt. ⁹ Ma bodo amiironek ceez, ma ako ajin Yesu anek ne, “Ma dim laadun niina akun ŋaadaŋ?”

Maje Yesu ajaki, ma ŋaan kabazek nɔɔnɔ.

¹⁰ Ma anek Pailat nɔɔnɔ ne, “Alaŋ arooŋ zoozeyan? Alaŋ agayan kanyei alaazet ci kaborcanin kibeem ci kadodoyin keete ween talakec o?”

¹¹ Ma abedeke Yesu nɔɔnɔ anek ne, “Ma da iŋaan kanyozeyin ineet alaazet nici Joowa, akɔmnin waan alaazet cun ŋaatan. Mazin giye nico eeti o ataalinan aneet ŋaatan, anyak niini oŋec ci adikir ɔɔɔt kujuk oŋec cun o.”

¹² Mazi azii Pailat zɔɔz nico, ɔɔɔŋ niini gɔl ci ka kɔɔgai nɔɔnɔ. Maje bar ɔl o Juz agerenyek Pailat anek ne, “Mā ɔɔga nɔɔnɔ, alaŋ koca bodo niina een laŋoti alaan o Rom adikir. Eeci eeti ci anyek ele kizi alaan ci adikir, amarnin niini alaan o Rom adikir.”

¹³ Mazi azii Pailat zɔɔz nico, udunai Yesu bitaalin, ma ako aavi niini loota lecere o roonnyo ŋaati agirgir. Kazi ŋinito zooze o Juz ne Gabaza. ¹⁴ Maje waanice ŋaan iiteni codoi ɔɔwa ka kizi iiten o loten o vardaŋinto. Maje ii ibilun boloca. Ma anek Pailat ɔl o Juz ne, “Alaan zin unooŋ adikir ce.”

¹⁵ Ma agerenyek niigi Pailat anek ne, “Ruk kadaak! Ruk kadaak! Tɔɔɔ nɔɔnɔ keete ween talakec?”

Ma ajin Pailat nɔɔgɔ anek ne, “Arooŋnyan dim aneet kɔɔɔɔ alaan cunooŋ adikir o keete ween talakec?”

Ma abedeke alaata o ceez o Joowo nɔɔnɔ anek ne, “Kanyaka naaga alaan o Rom adikir doon. Alaŋ een eeti nici alaan cinaaŋ adikir?”

¹⁶ Enico odoma Pailat Yesu anyewun nɔɔgɔ ka kɔɔt kotodooc nɔɔnɔ talakeca.

Adɔɔɔ ɔl Yesu keete ween talakec

Agamit ni takirnya Yesu. ¹⁷ Ma aduŋnan niigi nɔɔnɔ bitaalin, ma anyek kitik keet ceen talakec. Ma akɔyi zee been ŋinti kazi Golgoza. Ma keŋ ci zɔɔz nico o zooze o Juz kazi ne Amen ci Oowu. ¹⁸ Ma ŋinaante otodooc niigi Yesu keete ween talakec. Ma buk bodo adɔɔɔ niigi ɔl ceen ram keene ceen talaken Yesu libiroi. Maje Yesu adɔɔɔ nɔɔgɔ kɔrgena.

¹⁹ Ma ayeet Pailat zɔɔz keete ci zabal, ma arek keet nico gɔɔn ceen talakec o tadena. Azi zɔɔz nici ne, “Nici Yesu o Nazaret ween alaan o ɔl o Juz adikir.” ²⁰ Ma akɔp ɔl ci meel ole o Juz zɔɔz nico, eeci ŋinti adodine Yesu o ajɔŋzɔ kibeem Jerusalem. Ma zɔɔz nici ayeedi zooze o ɔl o Juz kibeem zooze o ɔl o Rom kibeem zooze o ɔl ween Garik. ²¹ Ma anek alaata o ceez o Joowo Pailat ne, “Mā ayeedi azi ne, Alaan ci Juz adikir, bar teyeet izi ne, Azi eeti nici ne, Keen naana alaan ci Juz adikir.”

²² Ma bar abedeke Pailat nɔɔgɔ anek ne, “Ma gi ci keteyeeda naana, ibilun noko.”

²³ Mazi ako adɔɔɔ takirnya Yesu, odomta eŋerit niigi rumanɛ ogin lak wec. Ma adoma gɔɔn takirenti ceeni akɔyi cigin. Ma adoma buk niigi rum onin adikir malkinto. Maje rum nici adoye ɔɔr nɔkɔ calaŋ aloli. ²⁴ Ma anɔ takirnya ne, “Alaŋ rum nico kareec, bar kutuguz maadico, ma anyak eet ci iinak ka kooyi kizi cin.” Ma gi nici agooni o ka keleeem zɔɔz o aduyai waragewe o Joowo azi ne, “Eŋeryek niigi rumanɛ ogan eleeti. Ma agɔɔn maadico rume onan malkinto adikir.” Zin gi nico agɔɔn takirnya.

²⁵ Maje yaati Yesu ki ŋɔɔni yaatin ki Meri ween ŋaa o Kilopas kibeem Meri o aku kuture o Magdala eel niigi ajɔŋzɔ keet ceen talakec adodine Yesu o. ²⁶ Mazi acin Yesu yaatin kibeem nuyai o gɔɔn areez niini eel ŋinaante, enek niini yaatin ne, “Yaai, inoko nuyaiti nici izi ŋeeron.”

²⁷ Ma bodo anek niini nuyai nico ne, “Nicini yaatun.” Zin iitene nice ele odoma nuyaiti nici ooyi Meri ole onin ɔɔt abaayit ki nɔɔnɔ ŋinaante.

Daayiz o Yesu

²⁸ Ma vurta mazi agawun Yesu odot liŋliŋonti onine, izi ne, “Arukan kor.” Aduwa niini noko o, ka keleeme zozz o ayeedi waragewe o Joowo.

²⁹ Maje njanaante anyak kodooc ci abiz nyaani ci amokcar oroot. Ma ajukek niigi nyaan nici tovot, ma itooneke Yesu otok moroka. ³⁰ Mazi atar Yesu nyaan nico, izi ne, “Inoko zin odota.” Ma aliba oo, ma adaai.

Akane Yesu libir

³¹ Ijinit ni alaata o Juz Pailat ka kanyek noogo kuduulit ol ci ona adodi talakeni o zozz ka kadaayito kataman ka kaaryak looc, eeci alaj arooŋ niigi ol keelit keeni zee been iiten ween Sabit, eeci Sabit nica iiten ci adiŋdiŋ oroot. ³² Uduulit ni takirnya zozz ci ol ceen ram ona adodi kibeem Yesu o. ³³ Mazi bar avunak Yesu, icinit niigi noono adaawun. Otonjit ni noono calaj aduul zozz. ³⁴ Ma akat takirenti codoi Yesu libir dilawa kudunta maama kibeem biye.

³⁵ (Aneet zin Jon o kicina kaal nicoko neen ci kaduwa zozz nico o, ka buk niiga utuyoo. Ma kaal ci kaduwa naana o eel didi to, ma kaga buk naana kaduwa kaal ci aleemnyai.)

³⁶ Ma kaala nici agooni o ka keleeme zozz o aduwa waragewi o Joowo. Eeci azi waragewi o Joowo ne, “Akom amene ogin codoi aduuli.” ³⁷ Bodo azi waragewi njamaan ne, “Acin bodo katin ol eet baal akat niigi dilawa e.”

Dawiin o Yesu

³⁸ Mazi eteet Yesu, iya eeti ci kazi Josev ci kutur o kazi Arimatiya. Josev nici waanice nuyai ci Yesu, ma njan bar kobora tuwen onin, eeci aŋole niini alaata o Juz. Iiya ni niini, ma ajin Pailat ka kanyek ele o Yesu. Anyewun ni Pailat noono kooyi ele o Yesu labak. Zin didi ook odoma Josev ele o Yesu. ³⁹ Maje buk Nikodimos baal akunak Yesu baal e orkora kibeem Josev. Anyaa niini kaal ci meel aŋol madiz kiyo karkari o ci kazi zaar ne mir kibeem alo. ⁴⁰ Odomta ni niigi dook ramana ele o Yesu. Ma anyaa rum o goon abunji ol goonŋi o adaai, ma aduutek karkar nico, ma atakucek ele o Yesu. Agoon niigi noko o, eeci nici keer ci ol o Juz. ⁴¹ Maje njanti baal adodine Yesu o anyak mana ci anyak boot ci jor njan adayai ci njan laadun karyek ol eet ci adaai. ⁴² Oot ni aryek niigi Yesu njinite, eeci boot nica aŋoŋzo ki njinti ona adodine Yesu o. Ma buk ibil iiteni codoi ka tiŋeere kizi iiten ween Sabit.

Njaazi o Yesu daayiza

20 ¹ Ma njere ririwona iitene o yubzento, ook Meri o kutur o Magdala boote ci baal arek ol Yesu o. Mazi ako arum niini njinite, acin be baal anyoogi ol boot otok e ipiyai boot otoga. ² Odokony ni niini kataman ook njanti Saiman Pitör kibeem nuyai o goon areez Yesu. Ma ako anek noogo ne, “Aarya ol ele o Manyi boota, bar zin alaj kagaya naaga njinti oot aryek niigi noono o.”

³ Ma njaz Saiman Pitör kibeem nuyai nico, ma adokony avo boota. ⁴ Maje nuyaiti nici tiir njanti Saiman Pitör, makacin ook arawun boot niini zowa. ⁵ Ma agiriiny boot njanti abilni niini bitaala calaj ako eecito. Ma acin rum baal atakucek ol ele o Yesu e doon. ⁶ Onowa ni Saiman Pitör noono, ma aku ako niini boota eecito enico ele. Ma acin rum baal atakucek ol ele o Yesu e ooŋ loota. ⁷ Maje buk rum baal atakucek ol Yesu oo e anyome juruŋ, ma aronek looc kedeyai gona. ⁸ Ook ni nuyaiti ona ajaar Pitör e boota eecito buk. Mazi acin kaal nicoko, agawun niini itija Yesu daayiza didi. ⁹ Ma bar njan niigi kagaac zozz o ayeedi waragewe o Joowo akati njazi o Yesu daayiza noko. ¹⁰ Ma enico imiirte nuyawa nici oot korgine ugeec.

Ayelzak Yesu ele Meri

¹¹ Maje Meri njan abil boot otoga alu. Mazi ululi ka kigiriiny boot eecito njanti aluwi noko, ¹² acin bar toonnyak ci tammo een ram boota eecito. Anyak niigi rumane ci vooŋ per, ma aavtiz niigi njabbaal arek ol Yesu e. Aavi codoi libire ci oowu o, maje codoi aavi libire ci zoonu o. ¹³ Ma ajin niigi noono anek ne, “Nja nico, alu naa?”

Ma abedeke niini noogo anek ne, “Ooti ol ele o Manyi onan, bar zin alaj kaga njinti oot aryek niigi noono o.”

¹⁴ Aduwa gi nico mazi abuudi, bar acin Yesu abil. Ma bar alaj niini aga een Yesu o. ¹⁵ Ma ajin Yesu noono anek ne, “Nja nico, alu naa? Arooŋ njeneen?”

Ma bar abaaban niini anyek kizi eet ci aliŋliŋ mane nico, ma anek ne, “Manygon, ma akoye ele o Manyi onan niina, duwayan da njinti ari o ka kook kodoma.”

¹⁶ Ma awo Yesu noono zaar azi ne, “Meri.”

Mazi ookci Meri, acin Yesu, ma anek ne, “Robonai,” o akati keŋ cine alaan o demziinto.

¹⁷ Ma bar anek Yesu noono ne, “Ma atorkodan, eeci njan rak kamiire kook njanti baaba. Bar bito duwak goonŋoga ween nuyak enek noogo ne, Kamiire kako njanti baaba ween buk baatunooŋ ween Jook onan, ma een buk Jook unooŋ.”

¹⁸ Imiiri ni Meri, ma ako aduwak nuyak gi o icini niini Yesu kibeem kaal dook ona aduwak Yesu noono e.

Ayelzak Yesu ele nuyak ogin

¹⁹ Ma iitene nice yomana ulute nuyawa njatodoi, ma anyoogek eleeti ceez, eeci aŋole niigi alaata o Juz. Iiyak ni Yesu noogo boyooŋŋoŋ, ma abil noogo korgena. Ma azaa anek ne, “Ibil ganon njatunooŋ.” ²⁰ Mazi adotiz zaawinta, eyelek niini noogo azeen kibeem libir njinbaal akane e. Mazi acin nuyawa noono, atalto oroot ele.

²¹ Ma bodo anek niini noogo ne, “Ibil ganon njatunooŋ. Zin kiyo buk itoonanan baaba aneet o, kitoonun buk naana igeet.”

²² Mazi adotiz zooze nico, ovoŋek noogo vooŋiz, ma anek ne, “Agamta zin vooŋiz o Joowo. ²³ Ma ooŋneku niiga ol baciinok ugeec, ooŋneku buk Jooi noogo. Bar ma alaj ooŋneku noogo baciinok ugeec, alaj buk Jooi ooŋneku noogo baciinok ugeec.”

Ayelzak Yesu ele Tomaz

²⁴ Ma iitene ci baal ayelzake Yesu nuyak ele neke, azee Tomaz o kazi codengon to. Niini buk nuyai codoi nuyawe ween amoto ram. ²⁵ Mazi ako aku niini, uduktak nuyawa noono enektek ne, “Kicinta uyen Manyi Yesu.”

Ma bar anek niini noogo ne, “Ma njan kicin tobe baal akani ol noono azeen lotomarete e, ma kuum naana alya azeene ogan, ma buk kari aziit toben baal akat ol libira e, alaj bai kagama zozz cunooŋ o been neen.”

²⁶ Mazi avo iinya ceen torgerem, ulute nuyawa ŋaatodoi bodo, ma anyoogek eeleeti ceez eecito. Maje Tomaz aavi to. Iiya ni Yesu nɔɔɔ boyoŋyoŋ, ma abil nɔɔɔ kɔrgena. Ma azaa azi ne, “Ibil ganon ŋaatunooŋ.”

²⁷ Ma anek Yesu Tomaz ne, “Ija, uum azeen cigan o ka cin. Zuwek buk aziit cun o toben baal akanan ol libira e. Má ŋaan bodo een bakbak, bar tuwo.”

²⁸ Ebedeke ni Tomaz nɔɔɔ enek ne, “Een didi niina Manyi onan, ma een Jook onan.”

²⁹ Ma anek Yesu nɔɔɔ ne, “Utuwo o, eeci icinan. Bar zin abil mayuwenet ole o atuwe ijaan kicintan.”

Gi o ayeedine waragewi nici

³⁰ Ma agɔɔn Yesu kaal oogi ci meel atet ol biye nuyak keberen. Ma kaal nicoko ogen ŋaan keteyeede waragewe nico. ³¹ Ma zin kaal o ayeedi waragewe nico ayeedi o ka mā atuyu Yesu Kiristo ween ŋeerti Joowo ka ojokta niiga roget o abil been neen zaare ogin.

Ayelzak Yesu ele nuyak torgerem

21 ¹ Ma vurta eyelizak bodo Yesu ele nuyak ogin liile o kazi Tiberas. ² Ma waanice arome Saiman Pitɔr, ki Tomaz ween coden, ki Natanyel o kutur o kazi Kana abil looce o Galili, ki aneeta Jɔn, ki Jemis o keegina lɔgoz o Zebedi, ki nuyak oogi ceen ram. ³ Ma anek Saiman Pitɔr nɔɔɔ ne, “Kako naana detiin liila.”

Ma anek niigi nɔɔɔ ne, “Korkorit naaga dook.” Otoodit ni niigi dook kavool ɔto detiin. Bar baalin nice dook akom kuluk ci agam kina.

⁴ Ma ŋeere ririwɔna iiya Yesu, ma aku abil liil otoga, maje bar nuyawa ŋaan niigi kiyazit nicini Yesu o. ⁵ Ma anek Yesu nɔɔɔ ne, “Lɔgoze, akom dim kuluk ci agamnu?”

Ma abedeke niigi nɔɔɔ anek ne, “Akom kina.”

⁶ Enek ni niini nɔɔɔ ne, “Ujuktek di cabak kavool libir ci azo o ka agamta kuluk.” Mazi ajukek niigi cabak ŋinito, agamun cabai kuluk ci meel ɔroɔ calaŋ anim niigi kutugurta.

⁷ Ma anek nuyaiti o gɔɔn areez Yesu Pitɔr ne, “Nicini ri Manyi gi.” Mazi azii Saiman Pitɔr zɔz nico, odoma rum onin, ma aborcek ele, ma iinak liil, eeci uyen aavi niini ŋaɔinyiny, ma ook ni niini ŋaati Yesu. ⁸ Maje kavooli ɔɔɔɔ dɔwɔn, ma awɔla nuyawa ceegi kavool, maje ŋaato agura cabak ona abiz kuluga e, ma avunak dɔwɔn. ⁹ Mazi atɔɔdak niigi dɔwɔn, amada zɔlɔmo ci agam goo ci anyak kulugit kibeem dokoc. ¹⁰ Ma anek Yesu nɔɔɔ ne, “Anyaakta kuluk oogi kuluge ci ona agamanu noko.”

¹¹ Ma ako Pitɔr kavoola, ma ako agurak cabak dɔwɔn. Maje cabak abiz kuluga ci adikir een eet tur ki eet ram kamɔto ki tiin iiyu (153), maje bar cabai ŋaan kereeci.

¹² Ma anek Yesu nɔɔɔ ne, “Ivita, adakto.” Ma akom eet codoi nuyawe ci ka kijin nɔɔɔ kenek ne, “Ineeta ŋeneen?” Eeci agaac niigi niini Manyi gi. ¹³ Ook ni Yesu gooya, ma adoma dokoc, ma anyek nɔɔɔ. Bodo adoma kuluk, ma anyek buk nɔɔɔ.

¹⁴ Enico izi lak iiyu ci ayelzake Yesu ele nuyak ogin vurte baal itijawi niini daayiza e.

Yesu Kibeem Pitɔr

¹⁵ Mazi adotiz niigi dayiinta, enek Yesu Saiman Pitɔr ne, “Saiman ŋeerti Jɔn, inoko dim areezan didi niina aneet ɔroɔ juko gonogu nicoko dook?”

Ma abedeke Saiman Pitɔr nɔɔɔ anek ne, “Ii, Manyi. Aga ri niina kareezin naana ineet didi o noko.”

Ma anek Yesu nɔɔɔ ne, “Zooti zin aza cigan noko juruŋ.”

¹⁶ Bodo abadaki Yesu nɔɔɔ jinen we ele anek ne, “Saiman ŋeerti Jɔn, inoko dim areezan didi?”

Ma abedeke Saiman Pitɔr nɔɔɔ anek ne, “Ii, Manyi. Aga ri niina kareezin naana ineet o noko.”

Ma anek Yesu nɔɔɔ ne, “Zooti zin aza cigan noko juruŋ.”

¹⁷ Bodo ni anek Yesu Saiman Pitɔr eecen lak iiyu o ne, “Saiman ŋeerti Jɔn, inoko dim niina areezan didi?”

Enico itiranyun Pitɔr ziniz, eeci ijinun Yesu nɔɔɔ zee been lak iiyu. Enek ni niini Yesu ne, “Manyi, aga kaal dook niina, ma aga kareezin naana ineet didi o noko.”

Enek ni bodo Yesu nɔɔɔ ne, “Zooti zin aza cigan noko juruŋ. ¹⁸ Didile kaduwakin ineet, baale gɔɔn maŋaan een logoz e, ijaaz niina, ma acabei rum unun, ma ako ŋaati olla arooŋ te niina biti. Bar zin tiŋeere ma ize matuwoc, acabjin eeti oman ineet azeen, ma akoyin ŋaati alaŋ arooŋ niina biti.” ¹⁹ Ma zooze nico aduwa Yesu daayiz o katin adaanji Pitɔr ka kanyake niini Jook diŋdiŋon.

Uduwa ni niini gi nico, ma anek Pitɔr ne, “Nowawan zin.”

Yesu kibeem nuyai o areez niini

²⁰ Mazi abuudi Pitɔr, acin nuyai o gɔɔn areez Yesu anowa nɔɔɔ vurta. Nici zin nuyai baal aɔɔɔ kibeem Yesu, ma ajin nɔɔɔ iiten baal adayi niigi dayiin o baalinu anek ne, “ŋeneen ci dim ka kataaloyin ineet o?” E neen. ²¹ Mazi acin Pitɔr nɔɔɔ, enek Yesu ne, “Manyi, ma dim tiŋeere eeti ceeni abil ku?”

²² Ma abedeke Yesu nɔɔɔ anek ne, “Mate karoŋ naana nɔɔɔ korok zee ma kabada katin, kazi cun ne? Ija niina nowawan ineet labak.” ²³ Mazi azii nuyawa zɔz nico, abaabanit niigi izito ne, “Alaŋaan tiŋeere nuyaiti nici adaai.” Maje bar Yesu alaŋ azi noko, bar olla azi ne, “Mate karoŋ nɔɔɔ korok zee ma kabada, kazi cun ne?”

²⁴ Zin aneet Jɔn neen ci kaduwa kaal nicoko, ma kayeedi o. Kagaya naaga kaala ci kayeedi o kaal ceen didi.

²⁵ Anyak zin bodo kaal oogi ci meel ci agɔɔn Yesu. Mā da inoko keteyeede kaala nici dook, adala waan waragenya looc dook dal.